

墓表陰記

行狀

清陰集十三







清陰先生集卷之三十六

墓表陰記十五首

三嘉府君墓表陰記

公諱大孝字希舜安東人曾祖司憲府掌令諱永  
銖祖平壤府庶尹 贈吏曹叅判諱璫考信川郡  
守 贈吏曹判書諱生海妣貞夫人完山李氏  
成宗大王子景明君諱忱之女生公于嘉靖辛卯  
五月二十日始以門蔭授冰庫別提轉尚衣院直  
長又轉司畜署司畜出補三嘉縣監階奉正大夫  
隆慶壬申五月二十日卒于官初娶廣州李氏再



娶迎日鄭氏三娶完山李氏卒未育大夫人愍公  
以適子早世無嗣命公弟之子尚憲為後尚憲登  
文科歷官至議政府右叅贊錄靖社寧社兩  
勲原從累贈公大匡輔國崇祿大夫議政府領  
議政兼領經筵觀象監事三妣貞敬夫人天啓  
壬戌後李夫人年七十一卒其四月葬于判書府  
君墓左酉向之原公初葬判書墓右以地之不宜  
也至天啓甲子改葬公墓與後李夫人同原異穴  
公猶子今吏曹判書尚容及觀公中身義而白哲  
鬚眉如畫怡怡和順內外如一善行草業詞章屢



舉不遂後李夫人宗室甬川副正諱億正之女靜  
正貞烈奉姑主祀敬以盡禮視所後子如已出閨  
門之內穆如也尚憲娶宣傳官李義老女無子以  
兄子光燦為後光燦娶清州牧使延安金球女生  
三女三男壽增壽興壽恒女未字

貞敬夫人具氏墓表陰記

故王果縣監 贈純忠積德秉義補祚功臣大臣  
輔國崇祿大夫議政府領議政兼領 經筵觀象  
監事青川府院君沈公掩之妻貞敬夫人具氏系  
出綾城考議政府左贊成 贈領議政綾安府院



君謚文懿公諱思孟王考司憲府監察 贈領議

政諱淳曾王考永柔縣令 贈吏曹判書諱希璟

母曰申夫人 贈領議政華國之女吏曹判書錦

之孫也夫人生長法家習與性成聰明和順為父

母所鍾愛年十四歸于青川青川大司憲青陽君

諱義謙之次子出後伯父溫陽郡守 贈左承旨

諱仁謙承旨即領議政忠惠公連源之適孫領敦

寧青陵府院君綱之長子青陵是我 明宗仁順

王后之父也沈氏族大且貴青川又上奉國舅宗

祀擇婦無不求備夫人入門舅姑喜曰佳婦也進



退贄謁又喜曰法家子也既饋享親族會者畢賀  
曰宗婦得人也下逮僕御無不呿口相慶夫人不  
恃舅姑之愛益盡婦道閨壺之內雍雍肅肅青川  
兄嫂亦尹相國溉之孫其二兄並文章顯仕夫人  
之兄成以名進士歷侍從勲封綾海君弟容詞翰  
行誼聲華籍甚妹為王子夫人方奕奕貴盛而  
妯娒之間相敬以愛不以門戶相矜誇聞者咸稱  
其有家法夫人性端莊儉約不好嬉笑不尚華靡  
不屑屑於財賄澹然一女士也文懿公不事家產  
子姓衆多申夫人末年孀居愈窘夫人竭力贍養



以及同氣之匱乏者不使為大夫人憂從青川公  
赴交河玉果二縣佐內治甚善己酉青川歿于通  
津丙舍近親婦女無一人在者於是殮衣衾手自  
製襲舍已上皆親莅既事輒哀號哭擗絕而復蘇  
感動鄰里夫人素病弱及當大事家衆懼其不興  
乃於倉卒悲哀之際能自致力附身之物必誠必  
慎至終喪不懈毀幾滅性而精神不爽人皆異之  
癸丑獄起荐遭子壻非命之禍憂傷無聊徃長男  
固城謫所天啓庚申十月十日終於密陽三郎浦  
之寓舍壽五十八青川先已葬通津不克歸祔權



厯靈山縣靈鷲山後四年癸亥 今上反正夫人  
之第三子以肺腑近屬密贊大計錄靖社元功  
封青雲君遂恩及泉壤仍就權厝地數里許卜吉  
得坐艮向坤之原以甲子某月日備物以葬夫人  
生七男四女長光世弘文應教次挺世仁川縣監  
次命世工曹叅判青雲君即 贈父母者也次長  
世昌寧縣監安世弼世俱夭歿次熙世進士以夫  
人命出後同宗女長適柳儁次成汝容次李植大  
司諫次李承亨應教四男二女曰攄進士曰攄叅  
奉曰攄曰攄女適林墀李穉側室三男攄攄仁



川一男曰楷女適白弘一青雲側室一女昌寧二  
女長適李正英次幼進士一男三女皆幼柳雋一  
男一女男斗卿女適李軸成汝容一男一女男雲  
翰女適元振溟大諫三男二女男冕煌一幼女適  
鄭鈐安光郁揔男曰若海餘幼曾玄男女四十餘  
人嗟乎夫人之先內外積義至於躬修婉孌慶鍾  
胤嗣而中履險艱憂傷道路陳衣非所葬閨周祔  
悲夫封贈之榮卒獲後報於是乎見天道也

秀才吳君墓表陰記

汝度名竑今禮曹參判吳公百岭之子富平府使



竣司憲府掌令端之弟也母曰貞夫人梁氏君年二十夫婦俱歿無子父母哀之命掌令子挺垣尸其柩既而哀之不已買石樹塚庶幾永其傳君同福人世有潛德至叅判暨伯判書晚翠公益昌大君質溫美秀而皙裏外如玉於物無所好獨好書楷法日進羣從兄弟多善書皆謂君未可量也娶南原尹衡俊女判書暉之孫入門舅姑喜曰佳婦也居數歲君疾尹氏晝夜不解衣藥餌手自調煎褻衣服必親濯積十月如一日疾亟尹氏知必不起欲先自決家人救之獲蘇既喪絕飲食饋奠之



外屨不出閫闕葬已愈毀手書二封篋之與母姑  
訣遂絕書中言嗣事語絕悲聞者莫不哀動泣濡  
衣也嗚呼君生于種德之庭既才而不遂婦又徇  
志以成其烈為父母大感豈天道也哉富平踐臺  
閣躡貳卿父子同列為世所豔掌令豐下衍祉俾  
君有後克寧親心亦可以慰孝子孝婦於泉壤也  
豈非天道也哉銘曰

才何良也行何清也壽何不羸有相維媛捐命從  
君烈烈其芬青烏之卜瑩珉之屬表茲埋珏

司憲府持平金君墓表陰記



故山陰縣監金公有子九丈夫其五人並登文科  
列臺省用 贈公吏曹叅判俾勸為人父者而餘  
三人者亦皆由司馬以進彬彬競爽世稱八才子  
長曰奉祖字孝伯早業文為儕流所推許既而困  
於公車年三十始選上庠四十二而登甲科例授  
司導寺直長轉成均館典籍司憲監察出為丹城  
縣監三年棄官歸又除慶尚道都事兼春秋館記  
注官坐事罷授西原縣監不赴拜益山郡守毋憂  
歸服闋拜禮曹正郎再為司憲府持平成均館司  
藝直講陞濟用監正庚午二月二十九日病卒于



京城之寓舍春秋五十有九是年五月某甲寔醴  
泉郡廣石山負申之原先人墓側君本安東豐山  
縣人遠祖某高麗三司左尹累世至 本朝有諱  
楊震工曹叅判生義貞弘文館修撰 贈直提學  
生農掌隸院司議 贈左承旨生大賢是為叅判  
公娶完山李續金女萬曆壬申七月十五日生君  
為人外和厚而內廉明謹言飭行與弟榮祖俱知  
名嶺南一時士友多傾嚮之凡有論議推君居前  
其或歧而左右者君兄弟劑而衷之無不黜已從  
焉嘗率同志伏闕疏觝異學之謗賢者後其人盜



秉管蒯士林徒黨乘勢修篲所指擬意在盡律它  
人聞者色悸君獨笑謂曰死生有命況我無所負  
乎適遇幸事寢操守堅確蓋如此叅判公卒諸子  
尚幼君率勵不懈成就學業卒以昌大其家奉養  
母夫人無違色居戚盡禮前後罔踰待人不設畦  
畛推誠善遇雅俗無所失鄉里翕然以誠長者歸  
之其立朝也不務交游避權勢如避阱以此寂寂  
久無尉薦者夷然不以為意後登顯仕其志不少  
易也丹城之政清簡仁恕民久不忘立石紀德在  
益山䟽剔積弊惠愛愈著平生不喜經營嘗謂諸



弟貧固不免作業何至區區太拘束乎著家訓倦  
倦於報本追遠之道至於婚娶問其家法如何不  
專慕富貴效世俗為也配光州金氏叅奉翌之女  
生一男三女男曰時宗馴謹守家法女適金是搢  
金熙洪汝濂皆士人嗚呼君有器量有才諳從容  
平進猶可致高位享遙齡而不幸厄於昏李晚而  
始通不究其用中道以致惜哉是為記

承旨李公墓表陰記

嗚呼此故承旨李公葵也從大父葵葵在萬曆甲  
辰十一月某日卒在其年九月某日夫人睦氏祔



其葬在己酉十月某日卒在其年某月某日穴用  
甲向山名曰餘金西去縣幾里縣為通津實畿內  
右道之地也墓不可無表樹之表表不可無記記  
之文文者安東金尚憲也樹之者公之子父澄久  
猶也其文曰尚憲外王父林塘相公與公考察  
公為僚銀臺尚憲以時聞觀察公以名父子清名  
冠世及後尚憲之先君子與公有契公之兄价川  
公又與仲父友善益聞公家事行所自來矣迨公  
之女妻於尚憲猶子見其得婦道甚而事同一家  
洪纖備悉公之清素謹飭能不墜家訓以承先範



後者耳目無爽也公諱鐵字剛仲全州人有伯有  
者佐我太祖開國封完城君完城之先與國同  
祖曾祖閏生司果 贈戶曹參議祖穆評事 贈  
吏曹參判考世璋江原道觀察使參判公壯元名  
士剛腸疾惡為權臣所構害其直節凜凜至今猶  
有生氣觀察公為都承旨故事 上備法駕出侍  
臣必盛服公素儉僅有褪色故紗衣寒暑無易同  
僚不敢異既歿喪具凡百家無一物同朝通賻始  
乃克葬同朝之賻自觀察公如夫人南原梁氏牧  
使淑之女生公於嘉靖庚子生最季也父母特鍾



愛然不衣之帛早失二親稍長自能勤學卒以成  
就與兄价川兄子久濠俱以明經及第並立於朝  
价川諱鏗嘗同業太學諸經生成稱公兄弟精通  
罕比至論治春秋者獨推公居首初以選補承文  
院權知副正字例陞著作博士歷工戶兩曹佐郎  
出為茂長縣監平安忠清慶尚三道都事龍川郡  
守坡州牧使入為工戶二曹正郎成均司成宗簿  
司僕兩寺正司諫院獻納司憲府持平掌令執義  
陞同副承旨轉至左承旨改禮兵刑三曹參議丐  
閑得襄陽府使其治與茂長龍川皆以約已便民



為務一境寧謐秩滿還朝充謝恩使如京師甲辰  
夏遇疾不起享年六十五卒後用扈 聖從勲  
贈吏曹叅判夫人杜稷署令泗川睦謀之女生二  
男三女男曰久澄掌令曰久涵監役女適士人柳  
崇仁次郡守李基高次正郎金光煥即尚憲兄子  
也掌令一男櫓監役一男二女男櫓女適鄭維城  
許忬柳一男瀝李三男一女惇叙惇謙惇行女適  
趙壽恒金一男壽弘進士側室一男曰久洽登武  
科曾孫男女若干人公內行脩備自以祿不逮親  
為痛祭必盡誠以事父母之道事兄及姊而如一



焉敦睦宗族有無與同不喜交游不事外飾不好  
聲伎與朋友處若婦人焉如見其過失必面規無  
後言以是所相識至老不渝嗚呼公可謂清恬篤  
行君子也夫人壽七十一婦婦母母配德毓慶備  
享諸福宜也是為記

竹州府使尹侯墓表陰記

同年友雪峯尹侯明叔卒於萬曆丁巳五月之二  
十七日去其生嘉靖壬戌正月二十九日五十有  
六年也後七年崇禎甲戌侯之弟完山尹德耀以  
侯之行蹟抵書曰亡兄之墓將篆石以吾子之知



之也敢以辭請嗚呼古人不忍銘其友而終不忍  
不銘吾於侯亦猶是也謹按侯坡平人尹氏自莘  
達為麗祖功臣勝國五百年累公累卿若文肅公  
瓘文康公彥頤事業文章輝映簡策世有其人考  
諱昌世內行淳備為政於家舍貞不仕後以子貴  
贈吏曹叅判娶副提學清州慶渾女生侯其諱  
燧其字明叔其號雪峯其表嶷然以挺而其中寬  
然以容其言退然以讓而其守確然以堅自少專  
於經學不喜作公車業既娶婦翁勸之學射侯奮  
曰世授儒徒技以蘄速化恥也顧立志如何耳於



是益自剡鉅未幾而遂良於藝年二十九中司馬  
四年而叅判公卒廬墓盡禮久之除厚陵叅奉  
明年辛卯擢明經及第選補承文院權知正字陞  
著作出為居山道察訪本職如故已轉博士又轉  
為司憲府監察拜寧邊府判官府為西閫故選強  
佐多不勝劇俟至而詔使適來事益殷監司才  
俟俾齊它郡邑之不齊者處之有方不苛以辦明  
年棄官歸已拜刑曹佐郎陞正郎改戶曹兼春秋  
館記注官拜陝川郡守忠清道都事俱不赴已拜  
綾城縣令悉心營職民徭武備無有不整政最屢



蒙褒賞三年棄歸已拜奉常寺僉正改通禮院相  
禮又出為寧海府使亡何換赴竹州候員幹局欲  
一有所自見遭權倖繼踵盜秉非聚羶者不售侯  
素無要路跡以是久挫沮鬱鬱不自得見時事日  
非又聞猶子無辜陷不測憂傷感慨以至屬疾昇  
還家近鑿數更藥不效竟卒諸弟以喪歸葬尼山  
縣北飛鳳山向辛之原實卒之歲八月二十六日  
也侯天性孝友施及親戚僚友一以誠信居官雖  
斤斤三尺而不為濕束嚴急之政先教後罰人人  
悅而易從所在著聲蓋由理家之推而本有濡染



所得云侯久已倦於宦為養未決去乃不得以餘  
年奉母休致之志耿耿就歿知侯者重為之哀也  
侯之顏行有五侯其長也仲曰煌久居臺閣直道  
多忤出尹完山餘並文科司馬立朝居官彬彬可  
觀配星州李氏府尹玄培女無子子完尹次男舜  
舉有文學側室一子曰勝絕女三人為府使李後  
天正郎李時樸妾舜舉觀察使咸平李春元女  
生二男翊宣翊商兩李皆有一子嗚呼誰之不如  
而不公卿者曠世同符命物者果何意歟果何意  
歟



姪晦伯墓表陰記

嗚呼此吾家大郎之葬而叔父清陰翁題其表曰  
大郎者我伯氏仙源先生之長子也其名光燭其  
字晦伯其生萬曆丁丑十月之二十一日其歿去  
其生二十六年壬寅二月之十七日其葬是年六  
月之朔日其地楊州之東陶穴之里石室之山其  
壙負成面辰之原其地自高王考 贈吏曹判書  
曾王考 贈左贊成王考 贈領議政府君三代  
之所卜其右叔父參奉君之塋其纍纍然環于旁  
側者同氣子姓若姪之殤而祔焉者也夫生與死矣



異哉此神道之所安也山本淺岡形局頗陋吾家  
故不譚堪輿書雖不盡棄其法至於禍福之理常  
欲致力於人事故所以不去故山久守祭祀以迄  
于茲者也始伯氏娶權夫人門族賀得賢婦已而  
舉丈夫子是為大郎又賀得佳胤在乳端好可念  
夫人之王父議政公命之曰慶以志喜猶長不勤  
提撕自就規矩其氣清而夷其行遜而敏其形不  
踰中人其口若不能言其志一定不易交游不喜  
廣而於其所與者必黜已而虛受讀書不務博而  
於其所習者必精思而力究先君子久病臂更藥



日再三使物輒假手居常鬱鬱承奉調護難得意  
諸子既出身營職獨委身於大郎積日夜更歲年  
愈久不懈能使親意順適而忘其病其小心敬畏  
如此嘗薦公車再試不利知其才者咸悼屈少俊  
之年一第豈足道哉嗚呼既予之厚而又棄之速  
造物者果何意歟其婦縣令李獻謨之女我 恭  
定大王之後事舅與舅之父母咸盡其誠遇喪祭  
必哀敬生一子壽昌歿之年始四歲任仕歷主簿  
縣監錄振武從勲 贈其父左承旨封母為淑夫  
人娶縣監柳煥女生二男一女長志學天次復吉



女未字判書府君諱璠平壤府庶尹贊成府君諱  
生海信川郡守先君諱克孝敦寧府都正伯氏諱  
尚容議政府右議政丁丑之亂殉義自焚於江都  
今於墓右歛衣冠為塚自有碑權夫人先歿後以  
伯氏貴 贈貞敬夫人其考曰佐郎愷系出永嘉  
奕世貴顯佐郎之考即領議政輟近代名相也我  
金之本原有四代碑刻此不詳也大郎少余七年  
相視如兄弟其心常以為叔父知我也惟我亦然  
寔夢之事意實有託豈謂若是其舛也所謂理者  
不可推而壽者不可知嗚呼痛哉壽昌將樹表于



墓請余辭余老病不能脩辭而終不忍無辭遂洒涕泚筆以書崇禎己卯正月日叔父尚憲記

雙清堂宋公墓表陰記

蓋當我恭定大王之世湖西之懷德縣有隱君子宋公諱愉始公少年喜武事遊京都有官階已而意不樂遂棄歸其鄉含章自貞以終其身鄉人高其風誼不稱其名而稱其號曰雙清堂年五十八正統丙寅卒于家葬縣南板橋里負土之原後二百餘禩幾世孫持平浚古以宗人耆老之請狀其遺行抵書屬尚憲曰先祖雙清公墓舊有表刻



歲久磨滅今將改豎宜有銘也子亦宋氏之彌甥  
謹以為託尚憲不敢辭按狀曰公之先出恩津有  
諱大原高麗時為判事三傳至明詎為司憲執端  
清裁直操為圃隱諸賢所重生諱克已進士是為  
公之考母曰安人柳氏高興伯濬之女公生四歲  
而進士公見背安人父母憐其早寡欲棄志安人  
知其意身抱兒行數百里往依舅姑終以女節顯  
彤史公既長器度豪爽名出等輩上內行純備柳  
夫人大康強康公怡愉承奉備志物之養祭祀必  
致齋潔儀文悉用古制性慎取予一毫不苟嘗搆



一堂為燕處之所即所謂雙清者也深衣幅巾焚香靜坐不以俗事經心惟松青竹翠環之而已朴公彭年作記以羨之一時名勝多酬唱之詠每遇良辰美景治酌命賓筆研墨樂各隨所好以極真率之趣鄉人莫不豔稱公配安人孫氏甚有婦德生二子曰繼祀判官 贈持平曰繼中司果傳至十代世益蕃衍內外子孫殆萬餘人賢臣正士譜牒相望何其盛歟公之隱德陰功蓄於躬而發於後者可見於此也諸宗姓合議置墓田十月上旬歲一祭之嗚呼以公之志之行嚮用於世比一時



立功名享爵祿者未必居後也願乃好遯丘園寬  
樂令終享有清福傳誦至今其親嚮之軒冕組紱  
身切而名堙者何如也此則人也非天也後之君  
子可以監諸是為銘

叔氏晚沙先生墓表陰記

吾兄晚沙先生諱尚審字季直姓金氏安東人少  
有志操厭世論卑隘買田江湖間欲放於畊釣二  
親在堂不忍去膝下因自號晚沙以見志先君諱  
克孝有五丈夫子先生第三也母夫人東萊鄭氏  
左議政林塘相公之女内外先德備載先君及伯



氏議政公神道碑俱近可見茲不詳先生生於隆慶丁卯二月十三日生而秀美清明和順最得父母心家庭之間未嘗有疾言忤色與人言出肺肝相視一毫不忍欺以故平日交游及所嘗容接者無不終始愛慕如親戚焉始先生才思過人既少年捷司馬聲名日起自以為一第不足取厄於病屢退公車薦授光祿祭奉棄官年三十八卒性喜酒遇輒引滿至醉不亂然以此崇其身哀哉配恩津宋氏縣令應光女有婦儀未育萬曆甲辰十月朔日以病不起去其生丙寅三十九年先生先



有痰疾久不治至是愈甚越十二月十八日繼逝  
前後喪厯兩閱月益可哀也以山之有忌權厝異  
穴至丙午十月合葬于楊州治東陶穴里先屯內  
乙向之原嗚呼先生有志不遂有才不售壽不及  
中身官不過末品有父母不得終養有兄弟不得  
同老無胤嗣以主後祀天下之有善而無報者先  
生最甚天乎痛哉先生歿四十餘年墓道無表季  
弟尚宓出牧洪州以書來告曰叔氏墓石幸具請  
叙之余老病哀傷昏耗略記十一俾後人知之

淑夫人陰城朴氏墓表陰記



夫人姓朴氏系出陰城司憲府持平諱光玉之女  
贈承政院左承旨林公挾之妻涑谷府使端景陽  
察訪瑋之母也持平公即世稱懷齋先生者自少  
礪志飭行動徇矩度遠近慕之函丈無虛席既卒  
鄉人廟而俎豆之至今夫人生長瀋家變禮罔愆  
懷齋鍾愛求其可為對者選於諸生而歸之于承  
旨公夫人入門能執婦道事皇姑徐夫人敬以婉  
事夫承旨公順以義徐夫人亦愛之如女與人言  
必稱孝婦宗黨取以模楷生二男端瑋承旨公蚤  
世夫人持戚毀形見者流涕挈二孤居止常依姑



氏教子義方卒皆有立端中司馬仕宦著能稱士  
大夫交薦之以都監郎錄靖社從勲用爵其父  
母夫人方在養親奉教命光動閨門鄉里畢賀  
再除便邑備盡志物之養埒亦茂才兄弟彬彬競  
爽初夫人愛二子欲顯其志凡所施予有請必從  
二子之義聲隆隆實夫人成之人謂其晚歲安榮  
天所報也夫人生于隆慶辛未歿于崇禎丁丑享  
年六十七葬羅州其地越三年己卯十月移卜咸  
平三角山已向之原距承旨公墓六十里子孫俱  
載承旨墓碣夫人自始病至屬續精神若恒日病



亟命屏諸孫之幼稚者內外安靜顧語二子曰汝等嗣守子姓盈堂吾年迫七死生常理復何怛也終不作悲苦語條然而瞑嗚呼此平日讀書談道者所未易而夫人能如是豈不賢哉史有賢婦傳它日職乘槁杙者宜有採也是為記

贈吏曹叅判柳公墓表陰記

蕊城靈竺山之陽負坎抱離之原有初葬者曰贈司憲府持平柳君晦甫之墓晦甫諱燦以字稱生而露奇穎稍長英氣勃勃逼人好結一時賢豪士一見意合即死生亡易見當世顯貴人有不潔



者輒唾罵之聞有氣節好義者雖在異世願為之  
執鞭言論侃侃遇不平事感慨百集涉義所否斷  
頭不可奪不能腹藏人過意有所蓄如噎物必吐  
之後已以故好者與忌者相半贅于觀察使崔公  
沂之門崔公愛之舅甥間相許為知己丙辰崔公  
為海州牧使時奸臣爾瞻謀廢 母后起禍百端  
其黨纘男筠共為媒孽嗾海州亡賴子朴希一等  
授指上變歸在大事崔公見誣狀責其妄杖斥之  
其親戚懼禍迫令自殺爾瞻脅道臣上聞遂起大  
獄反謂崔公護逆為滅口計也逮至金吾蜚語並



逮晦甫前數日筠使人陰嘗之晦甫不應復以書  
誅曰少依吾言者禍福在反手晦甫知不從不免  
惜曰畏死負義非烈士也吾雖苟免以而士類亦  
以而倫紀滅矣遂發筠私書及奸黨搆誣狀冀萬  
有一悟主奸黨大懼益加羅織竟考問晦甫及崔  
公俱死實某月某日也聞者識與不識莫不嗟悼  
後八年今上改玉昭雪冤枉 贈晦甫前職嗚  
呼亦何及哉晦甫子時定痛父非命列其事泣血  
請余曰願賜一言俾後人知必有見而哀之者矣  
余與晦甫父子善不忍其泯泯乃稍次其狀而叙



之以慰永求柳氏出文化後徙晉陽歷世著名累  
公累卿父諱重光司憲府監察大父諱浚軍資監  
正我中廟朝大功臣領議政菁川府院君順汀  
之曾孫殿中公娶典籤丁胤祚女萬曆丁丑三月  
二十二日生晦甫六歲喪母以孝聞壬辰從大父  
清風任所時倭寇道絕一日夢殿中君遇急即却  
肉冥禱已而計至果夢日也號哭請赴復讎軍中  
大父憫其幼弱不許友于同氣臨財薄取敦厚故  
舊急人逾已人以此多之見世事將亂歸桂陽丙  
舍不與時人交韓續男為子求婚晦甫顯絕之續



男大恨人謂禍始此嗚呼晦甫不量時度勢欲泄  
其胷中膈臆冀以明知已之冤救國家之禍暴奸  
蔽之情而卒不能回冥冥之天徒以七尺填化碧  
之箴世道既反日月重明而曾不得一快志於羣  
奸之輟係又不得與一時諸君子共觀昌大之會  
顧借余荒落之筆以求知於後世可哀也已晦甫  
厥有再室元配海州崔氏即觀察公女甚得婦道  
生一男一女男時定忠勲府都事女適李碩平都  
事錄靖 社振武從勲加 贈考吏曹叅判妣貞  
夫人繼室杞溪俞氏生一男殤晦甫定時時定亦



坐謫既釋改卜吉壤庚午二月自桂陽啓舊墓並  
奉崔夫人之柩合葬于新丘無遺憾可謂有子矣  
時定娶府使金尚寬女於余從女壻生二男二女  
男定生負寢天壻安廷燭韓聖與李碩平三男三  
女側室一男時蕃生二男定一男二女晦甫之天  
定矣未食之報將有待於是夫

刑曹判書韓公墓表陰記

公諱仁及字元之姓韓氏上世有諱蘭佐麗祖統  
三合一官至太尉子孫蕃衍重侯累公奕世燁赫  
為三韓氏族之冠入我朝有諱確以王妃父



歷事累朝再叅勳盟為左議政西平府院君卒配  
享 廟庭世稱襄節公者也高祖諱世佐副護軍  
贈吏曹判書曾祖諱侑副護軍 贈左贊成祖諱  
敬男副司直 贈領議政三世不顯官至皇考諱  
應寅由大科進臺省策平難功一等封清平府院  
君拜右議政謚忠靖推恩錫榮寵溢泉壤當世豔  
言妣貞敬夫人李氏 莊憲大王之後副司果聃  
岭之女以萬曆癸未某月生公少學家庭藝業日  
進既長與仲兄信及華問並著忠靖公俱愛重之  
辛丑中司馬己酉擢文科選補槐院庚戌薦入史



館拜檢閱例陞待教歷奉教兼世子侍講院說  
書轉成均館典籍帶三字銜再為司諫院正言遷  
侍講院司書弘文館修拱亡何忠靖公為奸黨罷  
搆事機叵測公乞辭職甲寅遭忠靖公憂持喪踰  
制病幾不全丙辰服闋退居湖西之保寧闔門自  
守不交人事癸亥今上初除兵曹佐郎陞正郎  
移修撰新貴人用事論議務為峭刻公歛避跡不  
雜要路喜事者欲借公苛摘自為標樹守夢鄭公  
曄以為言乃止久之拜司藝遷禮賓奉常二寺正  
復入玉堂為修拱時上罕接儒臣適公在館中



屢開經筵公每當進講拳拳致詳上頗虛心

傾聽僚友相慶乙丑丁內艱一如前喪喪除除司

藝移掌樂正大臣以公有文武材薦授鍾城府使

加緋玉明年病免入為同副承旨移兵曹叅議壬

申改題崇恩殿神主陞嘉善兼帶副總管仁

穆王后喪又題神主拜既馬之賜癸酉拜漢城府

右尹充世子冊封奏請正使由海路朝京未行

又以元宗大王仁獻王后題主陞嘉義明年封

典成還陞資憲賜土田臧獲甚優寵之又兼知

義禁府事實拜知中樞府事丙子刑曹判書公格



辭解冬拜松都留守西寇猝入公乘舟赴江都聞  
世子西行率僚吏出迎西路守臣坐乏供張多獲  
譴公獨免焉因祗役晨興忽中風昇至京口近暨  
言路論徑去官次坐罷己卯叙拜知樞庚辰刑判  
病辭癸未知敦寧府事冬副麟坪大君使瀋陽瀕  
行親故皆憂其病不任使公曰人臣之義豈可私  
便身圖冒寒往返值上違豫早朝闕下疾轉砭  
遂不起甲申二月三日也春秋六十有二訃聞  
輟朝遣禮官致祭哀榮之典備矣公為人形貌偉  
哲舉止華整發言處事重遲寬厚自幼見者皆以



遠大期之蚤歷清塗公望蔚然性矜持寡言笑不  
好交游不修飾邊幅以故仕路在通塞間晚雖登  
擢盤桓難進實不能究其用年又不永知公者咸  
惜之家居友愛篤至既孤事伯兄如事父遊宦遠  
方歷時不相見輒思戀涕泣痛仰兄藝而蚤逝形  
神為減折著之際自以逮榮異慶有別賜讓不受  
分婦家饒於財所分橐藏其厚終婦姑之世未嘗  
自取與人交有畛域而於其所合輸寫無贏蓄雖  
不合亦未嘗暴揚其過為已甚世以長者歸之善  
八漢每遇大學章疏塚刻文字 國家廟主率用



公筆家在南岳下燕居之處淨掃庭宇蒔花種卉  
案列書籍好集名畫法書不律隄麋之品俱極整  
齊客至相對忘倦夫人交河盧氏判中樞府事穆  
之孫翊衛司副率並俊之女婉孌執婦道居前喪  
致毀以歿生丈夫子二人女子子一人曰振遠四  
山監役曰命遠內侍教官女適承文正字李好徵  
振遠娶綾川府院君具仁屋女生三男曰聖舉聖  
與聖悅命遠娶士人南斗一女無子子聖悅李好  
徵四男二女曰最晚喜晚生晚見晚聖與二男最  
晚一女內外曾孫若干人公始葬楊州松川里負



良之山至戊子三月改卜抱川直谷村坤向之原  
與夫人墓合封焉嘗聞堪輿氏有言善人常得吉  
地推是理也公宜有焉噫墳崇四尺其表如之有  
來千年君子式之

仲氏 贈吏曹叅判行長湍府使墓表陰記

我先君有五男第二諱尚寬字仲栗自號今是齋  
幼卞急面斥人過見者憚之稍長摧剛為柔順若  
婦人事父母無違志視同氣如已與人言恐傷其  
意子弟循循於義方下逮臧獲不聞有怨言閨壺  
之內謚如也年十四五能為詩出遊庠序有所試



輒居高等見先生至爭相謂曰某可畏也已丑舉  
解元益籍籍有聲蹉跎不遂人皆惜其屈而十數  
年間等輩多驟躋青雲先生常忼慨自嘆曰吾志  
豈不如古人吾才豈不及今人而至於是命也遂  
厭就公車羣於酒人先生善歌詠天姿清雅風流  
映發每對酒起興停杯軟語楚聲數調無不懽然  
忘倦甲午筮仕為四山監役任滿選為工曹佐郎  
移戶曹長官才之分督海西漕輓以能舉職陞本  
曹正郎出為金城縣令吏愚民樸先生因俗為治  
上下相安遂以無事婦感棄歸尋拜太僕寺判官



久之拜珍山郡守以親老不赴復為本寺僉正居  
三年官事巨細罔不井井先生不事濕束而斤斤  
守三尺老胥猾吏無敢自恣戴法以行前後佐貳  
皆一時之選至於慈詳明敏得剛柔之適咸歸之  
先生陞拜淮陽府使本寺提調請勿改授世子翊  
衛司翊衛兼內乘俾掌廐馬之政擢拜長湍府使  
府居西門孔道介於兩京轡轂交錯官吏不暇應  
接百姓疲於奔命由此多以不善去者先生夙宵  
勤勵盡乳哺衽席之勞久而益乎於上下人情洽  
然稱服時詔使到松京剋期頒詔督造臨津浮



橋方伯以下皆憂之以為神施鬼設不及也乃以  
屬公衆力齊一不日乃成人始稱公能得人之力  
也方伯與遠接使皆以所見具 啓朝廷特施優  
典 賜廐馬表裏以賞之政績常為諸郡冠去後  
立遺愛碑癸丑坐姻家誣告獄罷去先生家業素  
薄屢為度支太僕郎官畿輔望郡田園無一畝之  
拓困於無所歸就先隴下灌園治圃為息影之所  
扁曰今是相羊自適與先生游者多題詠以美之  
至辛酉五月十二日以疾卒於家壽五十六以是  
年九月葬于楊州東面金村里坤向之原與夫人



同塋去先塋不五里而近以子光赫祭靖社從

勲贈吏曹祭判先生安東人高麗太師諱宣平

之後傳世七百餘年代有衣冠先君諱克孝敦寧

府都正贈領議政祖諱生海信川郡守贈左

贊成先妣東萊鄭氏左議政林塘相公之女夫人

宜寧南氏祭判世準之孫副司直應并之女賢有

婦道生二男三女長子光赫文科承旨次光燦堂

上縣監長女未笄歿次適士人鄭弘澤次適府使

柳時定側室子三人光燦光燭光炆壻二人李時

老李時陽也光赫無子以弟之子壽興為後進士



女三人李嬪金洪慶呂曾齊皆進士光燦生三男  
五女壽增洗馬壽興壽恒文科都事女李挺岳洗  
馬洪柱天啓奉李重輝宋奎瀛生員李光稷生員  
又有妾子四人壽徵壽應壽稱壽猷鄭弘澤生二  
男輔漢崇漢縣監柳時定生二男二女男長寔生  
員次寔天女安遠燭韓聖與光燭生二男一女男壽  
億壽萬光燁一女李時老五女李時陽一男二女  
內外曾孫男女并七十餘人

先妣廣州李氏墓表陰記

夫人三嘉縣監 贈議政府領議政金公大孝之



元配禮曹叅判李公英賢之長女李氏出廣州高麗名士道村先生集之後夫人生于嘉靖辛卯年十五歸議政公甚得婦道執舅喪過毀庚申三月初四日終無子所后子尚憲仕為都承旨錄靖社原從勲追封貞敬夫人後尚憲官至左議政例當封爵視其官而前已 贈九命貴無以加止如故云

先妣迎日鄭氏墓表陰記

夫人三嘉縣監 贈議政府領議政金公大孝之繼室迎日大姓成均生員鄭公泰亨之次女原州



牧使趙公崇祖之外孫牧使即靜菴先生先祖之  
介弟也名有家法夫人生子嘉靖壬寅年二十歸  
議政公天性豁達有女士風事夫子順事姑敬待  
妯娌和而有禮下逮僕御罔不稱德嘉靖丙寅十  
月初六日厄於產遂不起無子所后子尚憲仕為  
都承旨錄靖 社原從勲追封貞敬夫人後尚憲  
官至左議政例當封爵視其官而前已 贈九命  
貴無以加止如故云



清陰先生集卷之三十六



清陰先生集卷之三十七

行狀六首

先府君行狀

先君姓金諱克孝字希閔自號四味翁金為三韓大姓其源甚遠高麗太祖起草昧合三分為一時則有諱宣平以古昌兵佐之破後百濟甄萱策勲為太師亞父功臣歿與權幸張吉並祀古昌郡社後古昌改安東子孫之居安東者遂以太師為始祖今安東府三太師廟祀尚不廢苗裔益蕃昌名官聞士譜牒相望曾祖諱永鉅司憲府掌令祖諱



璠平壤府庶尹 贈承政院都承旨考諱生海信

川郡守 贈吏曹判書妣貞夫人完山李氏 成

宗大王之孫景明君諱忱之女判書府君有三子

先君其季也嘉靖壬寅九月十六日癸亥生于漢

城第少穎異超邁為判書府君所鍾愛既長擇配

娶左相林塘鄭公諱惟吉第三女林塘嘗親授之

學亟稱才氣過人戊午判書府君捐館先君與二

兄廬墓病毀幾不全壬戌選補 世子翊衛司右

洗馬以仕太早不欲出大夫人強之乃就先君英

茂夙成舉止有度承事接物以和以敬同僚十餘



人老少人品各不同無不得其心悅癸亥 順懷  
世子薨東宮不復置官屬退而家食先君生長純  
綺委禽相門既又妙齡簪組昕夕執衛而自勵不  
媿益習家庭儒素之業詞翰之美大為儕友稱賞  
甲子中進士其在里巷及游類宮所交友皆丈人  
行及一時才行著聞者人以此知其有所蘊乙丑  
朝廷收錄故宮家授 宗廟署副奉事庚午遷尚  
瑞院副直長辛未轉敦寧府直長癸酉陞本府主  
簿出為錫口縣監丁丑自免歸戊寅除同福縣監  
以親老不赴己卯除陰竹縣監辛巳罷歸癸未除



大興縣監甲申罷歸復授通禮院引儀兼漢城府  
參軍又遷宗廟署令丁亥出為豐德郎字戊子  
罷歸已丑左授忠州牧判官庚寅罷歸復授掌隸  
院司評又遷漢城府判官辛卯除鎭山郡守又以  
親老不赴授司饗院判官遭大夫人喪去職其為  
太廟官前後十年謹肅齋潔終始如一其見之行  
事者後人多遵以為法為尚瑞郎馬牌之法廢駟  
路撓亂請于長得申明之復使歸正焉其治邑皆  
以平直簡嚴為主不求數名一切掃除苛急鰥鰥  
誅求之政最惡違道干譽者必痛斥之雖其人聞



知不少避也持行不皎皎為潔而自守甚確妻子  
常不免困乏惟大夫人所領者必盡力致之得色  
喜乃安性骯髒在外未嘗以苞苴入京雖平日素  
厚者方居顯要則不輕通謁問有屬託不少枉循  
坐是所至數見罷免罷又無肯引薦者然終不悔  
或勸之曰公多子姓獨不為生產計耶先君輒笑  
曰各自有命何至愁勞廼公為癸巳今上在東宮  
撫軍全洪以翊衛司右翊衛役行常夾駕後先經  
閱寒暑時兵亂之餘郡縣殘破天兵遍駐湖嶺  
在處繹騷供張缺乏陪從諸臣艱苦備盡先君服



勤靡懈甲午拜慈山郡守凡五六年中供億天  
朝將帥餉給南征軍馬團習郡兵嚴明什伍悉盡  
力而後已己亥秩滿入授宗親府典簿庚子遷翊  
衛司司禦又除通禮院相禮皆以病不拜辛丑除  
廣興倉守癸卯改軍資監僉正甲辰又改繕工乙  
巳陞司膳寺副正壬子上追錄全洪扈從功先君  
與焉會曰臺評再勘乃筭月為率其不中率當削  
者或使子弟上疏陳乞有得復陞者人皆奔走拍  
射殺濫已甚先君以褒紀近屬姻族鼎盛又主勲  
事者多生平故舊否則諸子所善即先君一啓口



顧不乏與為地者而獨不言竟不得錄後上察知  
之特命加階通政授僉知中樞府事俾錄原從之  
首先是判書府君以孫尚容為判尹推恩 贈叅  
判至是以先君從勲之故加 贈判書遂恩及九  
原矣丙辰拜敦寧府都正戊午正月七日在漢城  
北里第遇疾四子及諸孫俱侍藥物醫治無間以  
不肖等無狀不能誠感神明疾以轉篤閱二十七  
日至二月三日癸巳棄諸孤嗚呼痛哉嗚呼痛哉  
贈議政府左贊成兼判義禁府事是年夏四月二  
日辛卯葬于揚州治東陶穴里判書府君地次丑



坐未向之原先君早孤事大夫人以至誠有孀伯  
嫂供養大夫人同居而先君別居同里近宅日至  
大夫人所朝夕起居灑掃庭內外一奴婢執則與  
仲氏敬愛交至怡愉湛樂終日以為恒遇判書府  
君忌日別具齋服居外室三日不接外事終身哀  
慕如一大夫人既歿禮事立嫂有加其赴慈山也  
迎以之郡奉養如大夫人一家之內無絲毫間焉  
先君居茅在 順懷廟宮之右每朝暮行過廟門  
必下廟旁入嘗竊視之昭闇不異值其忌日亦不  
食肉不與讌飲鄉黨益信內行之修待親戚遠近



壹以恩厚在所容無虛席中表有老鰥無歸者館  
之數年歿又衣食其諸孤惠養如子先君之喪皆  
持服以報德始先祖考時家稍饒財為鄉里親族  
所共仰給先君性好施於財少無纖裔不益治產  
業至末年官高祿厚而愈益窶困喪賴法贖暨親  
故之助得以襄事先君常誠不肖等曰吾家以謹  
飭簡素傳業爾等所知毋或忝我先德又曰官不  
必高衣冠不絕世為善士可也門庭之內不許出  
入異端浮屠巫覡不設雜伎不談說置券立契爭  
訟之事晚節患脚氣興居待人常獨處外室左右



置古今書籍名畫前列花草庭除之間不留一塵  
至者灑然易慮客到無親疏少長貴賤相與傾倒  
歡譔飲酒至醉醉不亂但不喜諛口及趨執利者  
雖來不開款去不再邀自頃五六年見時事日非  
憂傷慷慨或至歡戲感涕賓客子弟寬譬愀然不  
語命酌引滿時朝廷多變故大臣以下百官請  
闕請命或有非其本心惓迫強行者先君以病一  
不察不肖孤尚容亦以不與廷論將有大禍親  
知胥憂先君不少動屬續之四日臺章乃發先君  
有五男子無女長曰尚容登庚寅文科崇政判書



次曰尚寬長端府使次曰尚謩庚寅進士光陵叅  
奉先歿次曰尚憲文科承旨以先君命出後伯父  
次曰尚泌辛卯進士白川縣監尚容娶佐郎權愷  
女生三男三女男長曰光炯有馴行文學蚤死次  
曰光煥庚戌生負金浦縣令次曰光煥壬子進士  
女長適生員南好學生一男二女男曰老星次適  
翰林張維生一男二女次適生員李以省生一女  
俱幼尚寬娶副司直南應井女生二男二女男長  
曰光燁壬子進士次曰光燦方尚學女長適士人  
鄭弘澤生二男次適進士柳時英生一女皆幼尚



審娶縣令宋應光女元后尚憲娶宣傳官李義老  
女生一子不育以兄子光燦為後尚憲娶正郎李  
麟奇女生一男三女女長適生員宋致中生二女  
餘初尚容有妾子六人男曰光燭女為修撰韓仁  
及妾餘初尚寬有妾子五人男曰光燦曰光燭曰  
光焯女皆幼光炯娶縣令李獻謨女生一男曰壽  
昌壽昌生男女各一皆幼光煥娶承旨李鐵女生  
一男曰壽弘弘與昌俱業文光炫娶進士沈慄女  
生一男四女女長適士人趙錫馨餘幼光燦娶知  
事金存敬女生一男一女皆幼先君生於嘉靖壬



寅卒於萬曆戊午享年七十有七早自樹立脩文學列俊造聲譽藹蔚不幸數奇不得由大科以進然筮仕近六十年歷內職十三司二十一官外典六邑勤謹盡職卒能光承 寵錫以追榮父母子男五人皆有官位內外孫男女壻能業詩書得科名者八九人孫曾玄髫鬣總五十餘人此先君在世始卒人所共知之大略也嗚呼不肖孤等無狀養不能順志喪不能盡禮寔多掩矣而幽堂之誌尚闕使先人遺行在人耳目者日遠日忘不能早託不朽之傳則其罪長無所逃免哀惶憂懼若無



所容顧詞華擅聲世不乏人惟其言實服孫等之心與不以孤等之言為不信者獨執事是仰謹此泣血具書以斬垂省荒迷摧隕誤次無倫幸賜財擇

### 先妣行狀

先妣鄭氏系出東萊左議政林塘公諱恠吉之女贈領議政行江華都護府使諱福謙之孫領議政謚文翼公諱先弼之曾孫母元氏觀察使諱繼蔡之女也先妣生于嘉靖壬寅十一月二十四日資性端莊靜一生長法家動遵儀則足不蹈非禮之



地口不出鄙褻之語在父母之室應對執事惟謹  
與姊妹處羣而不譁年十五歸于我先君於婦事  
無不習事舅姑一於恭順舅姑甚重之不以門地  
才能加人姊姒相敬有鍾郝之美簡正率下婢僕  
罔或縱弛鄉黨咸稱其有壺法鞠養諸子雖甚愛  
自幼稚時衣服飲食行步出入之節皆教以法變  
一言一事之非理隨即警責俾不得貳常舉親族  
言行可為法戒者諄諄導飭不肖等祇若訓辭不  
敢違越以粗有成立者平日趨庭之外得於先妣  
之教居多焉從先君歷任五邑所到不許外人交



關不惑巫卜浮屠祈禳之術不通商貨市買之物  
衙門之內肅如也未嘗學習文字靡靡然以聰明  
自喜而雅有鑒識通義理論事是非分別人善否  
無不允當事當意與不當意不輕言愠人以急叩  
無所靳亦不叩人以急與人書及言語無過情之  
事俚諺煩冗俗多辭費不過數行言簡而當先君  
素不事經紀喜客好施末年家業益貧困殆不可  
聊然自外王父屢長兩銓久居政府舅氏蓬萊公  
亦再秉銓衡繼有韋平之拜又內連中壺東宮之  
親諸姪鼎賢並列顯要內外門族靡不賓緣希望



以遂其私先妣終始澹泊一無干請至於諸子所  
居官人有請事者輒謝遣之曰事若公正豈待吾  
言苟或違理是吾以非道教之不可為也不一為  
言之平生不喜紛華奢侈之習膳服惟務儉約終  
日正坐手執女工戶閤之間無故不出或謂某家  
內集某宅遊觀人譚以為盛事即今諸子通顯一  
時四邑之奉何所不備而作此寂寂耶先妣笑曰  
吾性所不樂何必倣人強為也伯姊長十年孀老  
窮居先妣母事之子孫有所獻雖少必分送有無  
與同姊亟語人曰妹氏友愛之篤人所難及先君



畜一妾死無子先君歿後至其死日猶命祭之曰  
皇辟之意不可廢也以先君追贈一品從封貞  
敬夫人親受恩誥年及大耋康強無宿恙子孫  
長幼晨夜侍側以為眼前戲笑之樂者恒滿室天  
啓辛酉從季子尚宥之任溫陽郡尚宥罷孫男光  
煥方宰尼山縣於溫為隣邑仍移往焉是年十  
一月初八日以疾卒于尼山之衙舍春秋八十先  
是次年冬姊文陽夫人卒妣哭曰吾母兄俱八十  
而終來年吾其逝乎至是果驗嗚呼痛哉嗚呼痛  
哉不肖等奉喪歸以其明年壬戌二月十七日祔



葬于揚州治東陶穴里先君墓左

海平府院君尹公諱謚行狀

公諱根壽字子固姓尹氏善山府之海平縣人監  
正 贈領議政海澄府院君忭考也司勇 贈左  
贊成希林祖考也掌苑 贈吏曹判書繼丁曾祖  
考也公母兄領議政文靖公斗壽及公並以勲業  
位極品故有是 贈母貞敬夫人玄氏以嘉靖丁  
酉五月生公資稟異常穎悟絕人學語便能識字  
自知為學不勤提誨甫十歲已通孝經小學四子  
等書編記歷代事實問輒應誦如神十三丁父憂



制畢游太學業日進聲名出等儕上雖前輩宿儒  
見者皆自以為不及戊午擢文科別試高第選補  
承文院權知副正字庚申承政院注書仕滿陞六  
品為養乞外得連川縣監壬戌入為弘文館副修  
撰曰 召對請伸雪趙文正光祖時諱言己卯事  
明廟實未知其冤不允公請臺諫阿權倖意論斥  
出補果川縣監未久文靖公為郎銓曹重忤權倖  
公亦被譴倖臣敗復叙由承文院校檢歷刑曹兵  
曹佐郎知製教成均館直講弘文館副校理吏  
曹佐郎再為副校理兼校書館校理漢學教授充



賀節使書狀官朝 京還拜吏曹正郎 賜暇湖  
堂議政府檢詳舍人司憲府掌令執義成均館司  
藝弘文館副應教典翰湖西大饑 命公以御史  
往視殫心賑卹所活甚多前後屢遷中書三堂薇  
垣相府不盡記壬申直提學陞承政院同副承旨  
轉至右承旨適授僉知中樞府事成均館大司成  
作成有方士爭興起癸酉以 奏請副使朝 京  
辨明 宗系誣污還加嘉善拜漢城府右尹出為  
慶尚道觀察使崇儒禮士所過先賢祠宇必作文  
祭之秩滿除同知中樞府事未至拜弘文館副提



學遷司憲府大司憲掌隸院判決事京畿觀察使  
戊寅言路劾罷時朝著間有東西朋黨之說論議  
趣舍動輒牴牾公之兄弟知不可苟合執正弗撓  
異論者搆捏不根旨中傷公兄弟因欲盡去諸名  
流金公繼輝為大司諫 啓曰尹某兄弟學行才  
冠竝著于時士類進退所關非輕不可以闇昧累  
人已卯出為開城府留守開城俗逐什一為利文  
風漸替公至士有知讀書嚮學者親與為主客禮  
觀遊譙飲必召與之士習一新未踰歲彬彬可觀  
多士設斯文宴以相慶公性愛山水得以暇屏導



從命駕獨造遇會心處輒嘯詠自適樂而忘倦望  
之者若天仙然開入至今稱慕之不衰會文靖公  
出知延安府與開城密通奉母夫人往來兩府間  
備極榮養世以為豔入為左尹大司成大司諫副  
提學吏曹參判甲申丁母憂服闋拜左尹工曹參  
判兼都摠府副摠管己丑宣廟以宗系誣汚  
未盡漏滌而得請在得人命公曰予欲以茲事  
煩卿獨卿衰齡獨賢久思之無以易卿卿幸毋辭  
公感激承命至則竭誠敷奏文字之外口舌陳  
辨無不曲盡禮部尚書于慎行亟稱之曰藩邦有



人矣於是 皇帝特命宣示秘史所載本國世系  
正本並頒會典全編宣 勅于皇極門內翰林學  
士將禮中國人皆驚觀以為前此外藩使介入朝  
者未曾有是也先是俞泓黃廷或等亦辨 宗誣  
雖得 准勅而來然國史改纂事有至難許而不  
遂至是始乃快觀成書 祖宗二百年深冤至痛  
昭雪如日星炳炳無復遺憾君子謂是慶也實由  
宣廟積誠所感而公之專對之力居多云及還  
宣廟大悅告成于 宗廟進公資憲大夫刑曹判  
書賜田宅臧獲庚寅拜大司憲禮曹判書兼知



經筵春秋館同知成均館藝文館提學策為光國  
功臣第一加正憲大夫封海平君復為大司憲禮  
曹判書又加崇政大夫議政府右贊成判義禁府  
事辛卯秋士禍作先是逆魁汝立出薦紳問其平  
日推挽汲引者及得交關往來書札情狀敗露死  
徒者甚多又有蔓延波及被罪過中人心不安奸  
臣遂乘隙大逞兇計歸罪按獄大臣指為黨人名  
卿賢士貶竄殆盡公亦削爵退居廣州村舍只以  
書簾自隨居處生理蕭然若寒士宣廟特念公  
冷本道存問賜米豆壬辰倭奴大舉入寇宣廟



西幸急召公兄弟復原封隨行至東坡驛 面諭  
曰卿兄弟勿離予死生以之到平壤承 命往廣  
寧告急請兵還報 行在加崇祿大夫工曹判書  
又加輔國崇祿大夫禮曹判書府院君無知 經  
筵春秋館成均館事弘文館大提學藝文館大提  
學已而控辭拜判中樞府事時 駕駐西塞 國  
脉如綫公以忠義自勵入贊帷幄出饋 天朝將  
士半歲之間三八廣寧六赴遼東每至血誠陳懇  
辭禮兼備聽者無不感動癸巳 皇朝遣兵部侍  
郎宋應昌經略本國 命公往迓侍郎既官重任



專東事安危在其掌握又聞性倨而亢朝廷難  
其賓公周旋應接咸中其宜侍郎優禮以待其還  
也亦同公入遼終始敬重焉宣廟回鑾故都以  
侍郎尚在遼東俾公留義州親解所御寶刀雕  
玉賜之曰此予平日手中物卿可佩之時以念予  
甲午為奏請兵糧朝京乙未復拜左贊成倭  
賊久屯瀕海天朝諸將老師不戰公劄陳進兵  
便宜數千言宣廟嘉納丁酉大駕狩南幸  
親督將士公陪內殿在遂安上章願執羈勒以  
從仍許還朝甲午錄扈從功公察二等再誥盟



血戊申

宣廟上賓議廟號公劄陳稱祖之非又

言奴酋必動宜速將練兵飭西北邊備後果驗公

自念年老在世不久求差祭官展謁 康穆二陵

以伸終身之感至丙辰八月遘疾醫問交道至二

十日告終于城西第正寢春秋八十輟朝二日禮

官致吊祭賻贈有加官庀奠事卿士大夫聞公歿

咸咨嗟相吊至於胥吏輿臺皆曰賢宰相亡矣奔

走來哭如其親戚公娶節度使趙安國之女生六

男一女男曰晄曰晔曰昭曰嚳曰璇曰璣公少從

事於性理之學如太極圖說通書經世書東西銘



靡不師授精通訪文純公李滉文靖公曹植論朱  
陸同異得其印證文純稱其聰穎邁倫他日造詣  
必遠成牛溪渾李文成珥相與為知心友皆稱公  
文雅世罕其比云教授門人多所成就後學稱為  
月汀先生居家事母夫人盡誠事兄如事嚴父待  
內外宗戚一以誠信不為表襮急難拯災不以死  
生窮達異視常曰人能孝悌忠信雖不談義理通  
天人不害為善人也為學將以行之學而不知事  
親敬長則非學也平生未嘗以惡言詈人亦不調  
戲玩狎人有摘抉人隱微者必痛責而禁戒之若



見人肆為非義者深惡之少不假借清白自守食  
無重肉坐客無羶衣服無奢靡之飾喪亂之後未  
有家舍文靖公捐貲買與之公不益治所居寢室  
不施屏帷床第敗簷短椽不庇風雨怡然處之門  
庭之內未嘗見聲伎玩好博奕之具子姓化之皆  
如公志平生嗜書蓄古今圖籍左右列置終日手  
卷不釋至老而猶篤遇疑難處輒自手抄客至號  
習於文者雖卑幼一一叩問為文以西京為主酷  
好太史公詩法盛唐晚又好觀 皇明諸大家聚  
精會神深得其髓 皇朝勅使熊化序公集有曰



沈薈澹雅有古作者風云書法瘦勁古奇 宣廟  
嘗論群臣善書者稱公為首久侍 經幄當筵講  
義剖析精微引喻備至累典貢舉所甄拔多知名  
士世比陸相公門生薦權慄郭再佑有將才後二  
人皆有功公嘗劄論時務 宣廟答曰卿勲高學  
亦高又曰予愛其博雅其受知如此 國家最重  
迎 詔禮 詔使來必推公居前或往境上講定  
禮儀或在 上前導達詞命蓋以公嫻於禮曉漢  
音也許翰林國雅有藻鑑見公謂曰真佳士也屢  
入 中國中國人士多願識者聞公來有候於中



路接歡乃去後公諸姪朝

京爭問公起居歷事

三朝五十九年功冠一代位班三事自公卿下至

郎署多門生故吏所到莫不頽伏擎蹠秉子弟禮

公益謙卑一未見有矜色其接於物也平淡簡率

易直予諒之心見於言貌好善愛士出自天性尤

罷引儒學布衣無間親疏故人無老少賢愚皆樂

為之從游不覺其為尊貴也公叅耆英社一再後

不肯往或問其故公曰余實眇福何敢每當殷禮

不喜紛華安於恭澹皆此類臨歿之歲乞暇將往

省湖南外氏墳墓以疾不果行蓋奸臣當國有廢



母之議公意不欲居亂邦也竊惟先王令典死而  
易名大行受大細行受小夫好學不倦文也臨危  
竭誠忠也孝親悌兄順也清白守節貞也貴而能  
謙恭也樂善下士禮也卹窮急病義也執正不枉  
剛也舉人不失明也存心不貳敬也公之言行功  
績俱載太史氏謹最其表著者如右以備採擇門  
人折衝將軍行龍驤衛副護軍知製教金尚憲  
謹狀

判中樞府事徐公行狀

判中樞府事徐公諱潛字玄紀大丘府人自號藥



峯遠祖開高麗郎將六世而有判典客寺事益進  
生戶曹典書義典書生安州牧使 贈達川府院  
君彌性牧使之魁司馬實我 朝開國初年也娶  
陽村權近女生二子長曰居廣嘉陽縣監季曰居  
正議政府資成久典文衡為一時宗匠策佐理功  
封達城君推 恩所生彦陽有子曰彭召司憲府  
掌令 贈吏曹參判寔公曾祖也祖諱固禮曹參  
議 贈吏曹判書考諱嶸號涵齋 贈議政府領  
議政三世追榮用公貴也涵齋公少讀書求志不  
事科舉之業大為士友所推重不仕蚤世妣貞敬



夫人固城李氏左議政原之後清風郡守股女也  
以嘉靖戊午五月生公于安東之外家生而毅然  
不類凡兒見者異之涵齋公歿公纔一歲大夫人  
念孤寡難獨立就依公仲父司藝于京城司藝諱  
淹兄弟三人伯諱岱蚤死無子季即涵齋司藝亦  
素未育宗嗣之托惟公一身司藝雖甚愛重之但  
欲納之順軌持守家法而已殊無望於蚤華夙茂  
也及年六七自知讀書若嗜欲然司藝公每撫之  
泣曰大吾門者必此兒然凡人家興旺之時才名  
壽福猶難兼備矧吾世祚不絕如綫惟當韜晦蓄



養以冀有後也授以孝經小學等書亦不程督司  
藝公門下受業者甚盛公時從諸生後竊識其所  
講書恒習之猶內而不出適中朝學士捧詔  
出來故事選有文之士俾和曾前皇華集各一編  
司藝公與是選未及措意公私擬之詩成呈進司  
藝大加驚賞益竒之及司藝歿心喪三年病毀累  
經危篤而身在床褥手不釋卷目所一覽未嘗遺  
忘由是藝業日進弱冠後龜峯宋翼弼問業成牛  
溪李栗谷二先生皆見而器之松江鄭相澈亦愛  
公藻思敏捷謂雲長宜遜師席一時名士多願為



之交癸未 朝論大垂臺諫首攻栗谷文成公必  
欲其去朝語極搆捏太學諸生抗疏伸辨四館有  
一人摘罰諸生以附黨議公亦在其中 宣祖怒  
其人命竄之於是謗口譁然指為題目公往山房  
讀書不與人過從丙戌中謁聖文科第二名忌公  
者嘆前事詘隸成均館權知學諭差仁川府鄉學  
訓導公略不芥意即之任訓誨不倦府伯姜公緒  
頗稱鑒識聞公之為心善之降屈迎禮曰公不卑  
小官真大度士他日名位必大某有子請以為託  
後果蒙公力俾不失職焉庚寅薦入史館由檢閱



至奉教時己丑逢獄連歲未解窮治黨與公謂金  
沙溪長生鄭守夢暉曰治獄之難自古已然今日  
處置頗有過當吾甚憂之二公皆以公言為是例  
陞成均館典籍遷司憲府監察歷禮兵兩曹佐郎  
庭試文官公製在高第拜厰馬之 賜本兵多事

文簿委積堂上才公遇有難決者輒以付公頃刻  
立辨咸中肯綮後來稱郎官任職者推公為先士  
辰倭報孔棘倉卒分發多倚公為辦移拜京圻都  
事巡邊使又辟為從事而本曹皆啓寢 大駕西  
幸公扈從至中道號召使黃廷或承 命奉王



子分往關東請以公為從事公在行傳檄諸路招  
集義兵為討賊捍禦之計俄而賊入關東奉王  
子轉往北道至會寧府時行在隔絕訛言煽惑  
土民鞠敬仁等作亂殺將士囚王子以下宰臣  
遣人迎賊公先事約南兵謀棄王子西走未果  
遂與巡邊使李瑛等跳出將赴行朝至鏡城又  
被叛民截路逼送賊營適先在賊中而素心服公  
者詭辭脫之還鏡城見其父老諭以大義聞風爭  
赴先得數百人願公為將公略加部署請本道評  
事鄭文孚于海曲勸其代領入保鏡城初鞠敬仁



之變列邑吏民多交關應賊及見官兵稍集人懷  
疑懼有土武姜德武者前日截路劫公者也公窮  
尋致之使之効力自貫授以弓矢出入卧内人心  
乃安遂移撤六鎮六鎮人亦起兵斬從亂者傳首  
軍前以聽號令吉州屯賊聞之猝至城下公選勇  
士出擊斬其一將追奔數十里殺傷甚衆進兵明  
川又與賊戰斬其六將馘八百餘級還我民男婦  
數百人賊大敗所遺棄槍刀器械不可勝計得黃  
金鎧一副知其死者乃巨酋也人謂自賊入北道  
無此奇功本公倡義糾合能得士衆之力也暨叙



功奏捷出於公手故沒而不見 朝廷未之知也  
評事以下將吏皆以輕重受爵賞公獨不與焉  
朝廷聞公免於難授典籍為召募御史又召赴  
行在間開冰雪行無入之地千餘里得達義州即  
拜司憲府持平適為兵曹正郎成均館直講知製  
教劉都督綏出來揀賓臣推公為接伴官都督一  
見合意所言無不從聞叔母宋夫人喪夫人即司  
藝公媿公乞解官心喪都督移咨請留有曰才猷  
練達言論慷慨恢復之策實藉本官云 朝廷亦  
堅不聽公公不得已就職屢辭乃許甲午春還



朝復拜持平還直講又以巡按御使出嶺南仍視  
三道舟師大將李質怯而貪汚公舉劾置于法軍  
政始肅公深憂朝廷恃援上國而無自立之  
志奏記朝堂陳戰守之策其大意具六萬兵分配  
水陸又具數百舟艦以當海路置三大柵于湖嶺  
之間張大形勢首尾應接又分置庾支于三道聽  
其便宜而不遙制必能贍足不匱並陳選將練兵  
屯耕瞭望與夫用兵機宜行師道路靡不詳盡宰  
相亟稱之曰李絳策而陸贄文也中朝論議多  
門主兵事者恐不能善後方開講和之端我國



重於從違會全羅監司李廷馥勸上宜姑聽之  
公曰上言其略曰虜以進貢為名而要以不可從  
之事終必執言渝盟然自古復讎之君生聚教訓  
於十年之後以今事勢徒為大言是執一之論也  
今姑一聽天朝之為而潛修自強待時以動豈  
非長筭後有難者公曰吾馳馬彎弓遭人非笑而  
不知止者豈樂於此哉必欲手殺賊而甘心焉羈  
縻之計一時之權無實而大言吾竊恥之也柳相  
成龍體察嶺南請公議事語及南方弊源公曰此  
似儒先之故也柳相驚曰何謂也公曰此道尚有



儒者流風人習聞先賢自重之言仕官者輕去就  
居鄉者恥入官府末流至於視命吏如無人儒宮  
書院倚賴聲勢傲然自以為士論而為吏者顧反  
受制焉今不正之後恐不止此也柳相不以為忤  
朝廷知公有文武才欲試之方面先與資序拜濟  
用監正秋擢慶尚監司言路論其驟改稱察理使  
又改之除內瞻寺正乙未分嶺南為左右道拜公  
右道監司擇形便地使為城守公就三嘉縣岳堅  
山城修築故址建雙忠廟祀新羅死事竹竹龍石  
激勵士民為必守計人乃信服遠近携妻子爭至



不煩招募得精兵數千人任滿又加數月丙申拜  
同副承旨秋兵曹叅議備邊司承文院副提調冬  
特拜江華府使未幾改江原監司丁酉倭寇再逞  
兩湖州郡不破則潰衣冠士女多流入本道公按  
兵境上威惠並洽人情悅喜秩滿朝廷聽民請  
留公固辭獲允百姓追思碑之入為兵曹叅議  
左副承旨陞都承旨適授僉知中樞府事兼五衛  
將還兵曹劉提督紆領兵再出南北軍不相得將  
不利於我國公承命見提督于安州遂得無  
事還加階拜黃海監司本道號煩劇經亂倍從公



裁處如流案無留牘已亥春移咸鏡監司不悅者  
論改仍任本道公辭疾歸西都村舍却掃佔畢秋  
拜戶曹叅判平安監司至則罷家戶徭立按田差  
役之法革營屬之弊與民均其勞佚民甚便之任  
滿還都承旨鄭仁弘嘆其黨上䟽攻牛溪及鄭松  
江網絡張設多造禍端領相李公德馨先去左相  
李公恒福引入在朝諸公無敢明言者公於上  
前極陳二公之賢當任之勿貳豈可以恠鬼輩誣  
善之言一朝致疑乎辭意切直上怒不入公言  
左右皆懼而退既出右相尹公承勲邀謝曰不能



一言愧公多矣公請急至三輒與告不獲已強起  
視事 中朝翰林顧天峻行人崔廷健來頒封  
太子 詔公周旋 近密終不失儀 上嘉之特  
陞資憲為漢城府判尹兼提調備邊訓練二局都  
摠府都摠管舟師大將遷刑曹判書決獄平允癸  
卯擢長兵曹請謁不行武選為之廓清未久辭遯  
知中樞府事出為咸鏡監司時北胡忽剌溫強盛  
入潼關殺僉使全伯玉移其種落密邇鍾城有窺  
我之形公欲發兵討之建言戎生心非我先發後  
必難制朝議多以為難公請益堅乃許之兵使金



宗得違公節度師竟無功始不可者爭咎公請致  
于理 上命御史查聞斬虜首四十餘級我軍未  
還者纔數人然坐此罷歸秋叙還樞府並還備局  
揔管又兼知春秋館事改戶曹判書是後本官遷  
改而兼職則並仍帶焉又加帶知義禁府事適歲  
澇民饑公振救得宜民不失業丁未為京畿監司  
大臣欲請仍為用事者所沮任滿還樞府坐前任  
微事罷免 宣祖薨光海即位赦叙樞府監 山  
陵方上事完加正憲議政府叅贊冬論 陵工不  
固罷改己酉春復知樞改判工曹又改叅贊 命



大臣體察諸道以公為副俄拜開城府留守一切  
釐革弊政置養廉庫以助卹俸薄不自給者籍  
其贏為賓客軍興不時需後值皇朝中貴人捧  
詔出來久留本府所費無筭皆取諸庫中而民不  
知又請於朝擇能文士為教授厚其俸而加之  
禮勸勵責成親詣學宮講讀考藝士爭興起成就  
者甚多公去後立石頌德辛亥遫還知樞改叅贊  
壬子春金直弋獄起奸臣爾瞻等大設機穽媒孽  
異已以立威權嗾臺諫指公嘗容接罪人奪職閑  
住至冬叙知樞明年癸丑夏爾瞻等嗾死囚朴應



犀使從獄中上變言國舅金悌男挾大君謀亂下  
獄賜死其子壻親戚並死拷掠錮永昌大君于海  
島逼殺之以公名在 遺教中與故相韓應寅判  
書申欽朴東亮同日被繫光海親問受辭即命釋  
歸田自便爾瞻之黨柳活為獻納斥公暨李相恒  
福黃公慎請速竄光海命止中道配丹陽郡始  
宣廟寢疾心憂光海異日之事 御筆書教封置  
宮中戒曰我死乃下 上薨 王妃下教書于大  
臣其教書云不穀忝位負罪臣民若隕淵谷今忽  
得重病夫脩短有數死生有命晝夜之不能違聖



賢之所不免夫復何言但大君幼稚未及見長成  
以是耿耿耳我不幸後人心難測萬有邪論願諸  
公愛護扶持以是託之外書宰執七人姓名公與  
焉其宰執三人詣賓廳受而見之即封還餘三人  
者居外不得見公亦以無官職不敢入 禁中就  
伏 闕門外哭泣明日韓相應寅以赫䟽傳示始  
知 遺教下也初爾瞻得罪 先朝深懷怨懟會  
偉相柳永慶陰結奧援所為多不善謀危國本之  
說道路籍籍爾瞻乘機與鄭仁弘潛通上䟽請罪  
上大怒並竄遠道光海初驟秉國政其釋憾逞毒



之計無所不至宣言遺教非先王意出於矯  
偽使諫官李志完柳活等諉以七臣不即辨明請  
並削職適武人鄭浹者素恠怯連引逮捕爾瞻等  
遣人於中路誅以如此則生否則死於是公卿名  
士一時陷獄者數十人公亦被逮諸子請問所言  
但曰一國事至此復何言哉爾等教諸兒強為善  
勿以家禍自沮公按嶺南時仁弘居部內前後奉  
使者無不往見公不一過其從弟仁誼倚仁弘殺  
人犯辜公將正法仁弘方守寧海解官歸祈請不  
已公不少撓仁弘甚恨之故公得禍尤重居丹陽



閉戶讀易孜孜不輟有問業者誠心誘掖時朝議  
益峻承望者動以七臣為奇貨駭機交設人不可  
測公處之怡然客見其顏色言動無異恒日不知  
其有憂患也乙卯春遭大夫人喪丙辰爾瞻等定  
議廢母遂追刑金榜男加七臣罪以階上浸大  
司憲瑾大司諫造副提學瀾等交章請之公竄寧  
海戊午服闋盡取家藏書籍置左右屏除餘事披  
閱忘倦六歲量移原州旁縣儒生有欲疏陳爾瞻  
罪惡者其黨聞之規受之於公兩司合請安置絕  
島光海久寢不下癸亥今上反正除刑曹判書



召還京公入侍首陳天位克艱之說變移風俗之道又言昏朝黷亂之際奸臣誘集無賴迭投章疏此輩固不足深誅韓孝純以大臣督率百僚勸子廢母其罪擢髮難數今雖已死可罪其子也

上命寬孝純三子孝純即淑房近親初無敢言者而公獨抗論得允中外快之自十數年來戚里宮妾之家攘奪為事百姓抱冤莫伸至是羣起而號訴者日以百數公奮髯抵几郎吏慚伏語下決遣無留滯衆皆悅伏拜大司憲兼同知經筵成均館持論峻正擬法決事人不敢干以私廢世子



庶出女子在民間者請廩養德興私廟為後者宜  
如先王命世襲冠帶上皆從之時人心未靖  
逆獄屢起公在鞠廳議讞務為平反大臣多咨度  
焉數月適授叅贊甲子李适叛寧邊群臣皆請移  
蹕以避其鋒公獨奮言於朝曰遣將據臨津諭  
以逆順烏合之衆勢必自潰況百官宿衛無闕畿  
甸勤王之師不日當至以天威臨之賊不足  
誅也豈可見此小醜而遽離都城也入見上言  
曰逆豎稱兵向闕未即誅滅此羣臣之罪臣實痛  
心臣嘗任兩西及松京知其人心今雖老矣猶可



一行如蒙試往之 命必不敢負國矣時 朝議  
已定不能用公策 駕至天安郡復拜公大司憲  
行在朝儀草刑群臣進見啓事紛雜失度小官卑  
偕並進爭論言多妄說無復 朝廷之禮公厲聲  
叱退謂首相李元翼曰討賊興復之責大臣任之  
公何無一言指揮而聽此紛紛耶李相唯唯而謝  
賊敗請治京朝官不赴難者皆罷之 駕還賞從  
陞正憲以前有鞫獄勞又加崇政拜判中樞府事  
改刑曹判書又改兵曹武士聞公前政無私咸喜  
得公將改軍籍口授條例若不思而為之後繼公



者或變其一二室而難行始服公慮事為不可及也 上講孟子公入侍 上問所謂義兵云者何居公對曰以義舉者皆是也固非一名也今逢胡為蛇豕荐食遼東我國為 中朝出兵征之是亦義兵也萬一不幸虜若犯關傳圻我國當悉賦渡江以伸君臣之義臣職在典兵不任區區上嘉納之乃 下教曰聞徐某所陳大哉斯言我國賴 先皇帝大恩得至今日何可忘也大義所在強弱難計其令廟堂預講以待丙寅辭還判樞自癸亥還 朝之後有退休意買地楊根江上結



草舍為終老計 國家多事黽勉數歲丁卯入耆  
老社決意致仕正月虜猝入西關 上出幸公以  
宗廟提調奉 廟主往江都公嘗以固守根本之  
策上劄力陳言不用及是以軍律不嚴請治元帥  
以下諸將退縮之罪且言龍岡等六邑幸不被兵  
他日恢復關西必籍此為資叛賊韓濶導虜入寇  
黃海一路受毒必甚勿以講和為恃宜急調精銳  
先據海信二境及龍岡等六邑以防搶掠 朝廷  
亦不用已而果如公言虜責還我 國歸正人時  
大臣主和者以為不忍邊地數人之命失歡強虜



非計也將役之公曰如是非為民父母之義其何  
以子萬姓乎使人心憤惋將士解體且啓虜人輕  
侮之端不可從不聽然識者韙之戊辰治柳孝立  
獄進階崇祿無何非意被譴下理數日出之叙復  
叅贊提調掌樂惠民等局請暇上冢欲仍歸楊根  
以疾不果還為禮曹判書都督毛文龍為督師袁  
崇煥所誅其部將劉興治在我國皮島與所部  
降獐作亂殺欽差總兵陳繼盛聲言請命  
中朝實遣人潛通虜穴兇狡叵測上問諸宰樞皆  
曰當任上國計處且恐虜以為言公對興治擅



殺主將自恃絕遠揜罪為功坐要旋節 中朝雖  
不欲勞師遠征我 國聲罪致討斬其梟首賑其  
餘民移咨撫臺轉奏 中朝 天子聞之必嘉悅  
而虜亦知懼矣 上竟出師問罪公之力多焉以  
疾乞解職 上命內醫賫藥往視尋復叅賫禮判  
知樞旋辭旋授至辛未四月十八日卒于家壽七  
十有四計聞 上輟朝二日中使致吊禮官致祭  
司徒庀葬以子景庸錄扈 聖從勲 贈議政府  
領議政兼領 經筵春秋館弘文館藝文館觀象  
監事 世子師自 反正後望治愈勤而世益多



故論者謂待公入相而庶幾有為也生不及命公而歿乃有是贈君子咸惜之以其年六月乙卯葬抱川雪雲里丁向之原先兆也治命儉葬諸子不敢有違焉公天姿雋異長身美髯語音洪亮外嚴而內弘達望其儀表接其言論知其為君子長者處心公而自守確人無親疎惟賢是與事無彼我擇善而從與人論議毅然挺立不少苟合如朝貴之是非朝政之得失直言不避人以是憚之常曰吾少無交遊素門平進蒙聖朝厚恩最久豈可為區區取容之計以負國家乎欲使國事



無洪纖一入於矩度中是吾志也奸黨素忌公當  
誣獄之起必欲甘心乃已由峽而極於海所擬非  
拊楊則梓棘也未嘗見諸辭色憂國之誠不以進  
退有間每聞朝家舉措垂刺咨嗟不已至忘寢  
食者久性嗜書博覽經學則以踐履思索知行並  
進為功史書則觀治亂所由賢邪消長之幾淹貫  
精熟多有獨得於文字之外者遇事辨證無所滯  
礙雖老師宿儒服其該暢久讀周易以先天為主  
先儒論辨所不到亦必精思力探有所得則隨意  
立說以資質疑鄭愚伏經世赴官過公謫所公問



易疑義鄭大驚曰吾久侍 經幄自謂用力於此  
書多矣未嘗講究及此恨不得留身相益也公嘗  
語子弟曰不識三才之道者非通儒也唯深於易  
然後可以知之天機淺者不可強而至必私慾淨  
盡天理自明可以與言此也詩家工夫消遣歲月  
非有所益故不汲汲也然於詩天分甚高徃徃有  
作者風前後受任方面遍歷六道未嘗憚勞自佚  
窮邊絕塞人跡罕到之處亦皆登陟觀覽至於山  
川險易道里遠近開隘戶口緩急多寡一皆留心  
隨事料理指陳規畫千里之外如在目前或問白



沙李相當今人材可任大事者誰歟李公屈指  
字謂公曰徐某其人也張玉城晚老於兵事其為  
元帥亦讓於公一時屬望蓋如此居家日晨興起  
居大夫人所大夫人夙嬰疾病以未亡自處雖祿  
養之榮備物之享不以為樂故非有朝衙公事不  
去左右終日侍側多方以娛之公謫後大夫人不  
勝思戀徃從丹陽竟至不幸公哀毀過制幾不獲  
全平生自奉甚簡食不重味衣不完采一家之人  
不敢以奇裘不正之服見於前嘗於辭受不以其  
道不取然近名之清絕俗之介亦不為之其天性



然也自以年過致仕遭時艱虞不得遂退休之志  
朝參之外罕預國政與隣里耆老諸公作真率  
會佳辰令節日相往來軒車交集金玉輝映子弟  
扶侍者亦皆貂蟬皓白一時稱豔夫人礪山宋氏  
廣州牧使寧之女領議政軼曾孫外祖曰參贊申  
瑛天啓壬戌年六十九先歿公之葬穿夫人塚而  
同窆焉夫人婦德夙成弱齡當家閭內之事夙有  
不虞親戚鄰里咸仰其仁享先極敬事姑盡誠大  
夫人年垂大耋夫人亦過六十左右奉養祇順不  
惰四十餘年如一日及喪致毀成疾終以此不起



公屢鎮雄藩夫人常戒飭婢僕內外斬斬公喜賓客所在無虛席酒食之奉一承公意自癸丑後禍患百罹危苦萬狀隨分處困委之時命公有時放言夫人必從容規諷多所裨益以是尤敬重焉其通達大義如此在世視公貴歿又追贈貞敬夫

人生七男四女長景雨承政院左承旨次景需司僕寺僉正次景霽果川縣監次景霄承宣祖弟一女貞慎翁主封達城尉餘並天承旨娶司果成希舜女生一女縣監崔浣後娶僉知成恬女生一男元履侍直僉正娶金僖女生六男曰亨履曰擇



履翊貧曰祥履正字曰圭履曰弘履都事曰明履  
果川娶監察李好仁女生二男四女曰準履曰言  
履女長李墳次權順悅次趙胤錫次林宗儒尉生  
三男五女曰貞履縣監曰正履曰慎履女長金珪  
贈持平次李命寅奉事次沈伉次權堦注書餘幼  
亨履四男四女祥履二男二女準履二男一女貞  
履一男崔浣一男一女李墳一男金珪一男李命  
寅二女沈伉二男權堦二女公以高世之識邁倫  
之才遭遇 兩朝出入內外其謀猷功績載之簡  
冊播人耳目誦於民口至於卓犖之節廉歲之操



充為人所傾仰子為駙馬而內無宮禁之援身居  
貴重而外絕苞苴之託財賄之談不掛於口市井  
之徒不跡於門質之千萬人而無愧垂之累百世  
而不泯此非私言也乃國人之言也尚憲實不文  
不能鋪張敘述謹就家乘略加詮次以俟立言之  
君子

堂兄刑曹叅判金公行狀

堂兄休庵先生諱尚寯字汝秀我金氏遠有代序  
至羅季諱宣平為古昌郡城主助兵麗祖報仇甄  
萱以功封太師廟食古昌古昌後改安東子孫遂



為安東人由太師以來四百餘年蟬聯龍興慶八  
本朝自中顯大夫判典農正諱得兩三世而至高  
祖考司憲府掌令諱永錫曾祖考平壤府庶尹  
贈吏曹判書諱璿祖考信川郡守 贈議政府左  
贊成諱生海贊成府君有三子仲曰諱元孝軍器  
寺正 贈吏曹判書聘完山李承說女 恭定大  
王子謹寧君禮之後嘉靖辛酉五月十一日生先  
生幼服嚴訓不出家庭孜孜進學稍長遊黌宮兩  
試輒屈其曹偶斐然有聲弱冠舉發解第二名李  
文成公掌文衡亟稱其才由是名益著中壬午進



士乙酉居母憂以善喪聞制畢益自刻苦讀書恒  
至丙夜不就寢如此積久群從弟從而肄業者寐  
間聞先生伊吾聲雖未窺卷而尚能稔誦其文字  
庚寅登文科選補永文院權知副正字壬辰故相  
沈公守慶建義湖西討倭寇以先生為從事諮議  
幕畫甚重之癸巳赴行在薦授承政院注書移  
拜藝文館檢閱陞侍教時倭據濱海郡邑朝夕再  
選朝廷將復請天兵遴遣使臣事機危急人  
多憚行上引見問疇可往者諸臣未有先應  
上意頗不豫先生方珥筆記注使事非其任迺自



請願充下俗 上即許之褒予甚至竟以史官不  
滿不果行然 上固意屬之明年陞奉教轉兵曹  
佐郎移禮曹又明年還兵曹每銓注 批下未嘗  
越先生而用他人也已創設三路御史分遣巡按  
先生當江原道至界廉得犯法吏按覈請治犯法  
吏者即用事大臣所親昵反嗾臺諫彈劾之 上  
察其狀罪犯法吏而直先生無何靈光郡缺守素  
劇且近賊籍言需材越格授先生實外之也先生  
悉心營職不少見幾微居三年政成豪彊屏息奸  
吏不敢欺米粟充溢魚鹽至不可勝用課績為一



道最丁酉倭鋒逼湖南易武吏先生見代方伯請  
為從事冬又被麻提督僉使辟召隨往嶺南島山  
之後常在軍中明年陞軍資監正改成均館司藝  
又改內贍寺正充湖南調度使饒 天朝水兵又  
明年還 朝復出為公州牧使州乃湖甸襟喉兵  
荒戶口散亡幾不為州適修山城使監司開營征  
輸保障左右交責前數守俱以能選而至輒敗去  
先生至凡衽席而乳哺之者靡不由盡惠愛周洽  
數年之後流逋盡歸百弊修舉上下相安公私俱  
足卒以告完體臣道臣及臺使者相繼上治績



命增秩 賜書褒義初州遣吏來迎故事守試  
茹吐必先報之而書送大歲王三字諸老吏大驚  
曰此定不可犯者也先生臨下不已嚴而其聰明  
剴斷為吏所畏憚如此壬寅以病有免歸大臣薦  
授四道調度使出入關嶺二湖險阻經數千里得  
粟累萬石軍食裕而民無病焉三歲迺還旋有海  
州之 命州即亂後 駐蹕之地 宣廟特念之  
必欲選良牧以惠其民銓曹所薦擬皆不當上  
意凡三易擬而至先生先生勞役于外且十餘年  
知識爭勸病辭先生蹙然曰既出身事三度險皆



吾分也。黽勉赴官，至明年免歸。先是，州田政不綱，吏假手上下，豪右詭免小民，偏困先生。按籍而加整齊焉。徭賦始有挈法，蓋久而人人稱便。相謂曰：「金侯之惠我民，世世不可忘也。」秋，拜竹州府使。州有山城，當南衝，須文武才，得先生為重。故也已坐事免。戊申，拜承政院同副承旨，序陞左副以。十月，秋使朝。京師還，拜右承旨，轉左承旨。皇帝遣太監冉登冊封世子先生，以禮房周旋，無關進階。嘉善擢都承旨，已適為同知中樞府事。無五衛都總府副總管。明年，又進嘉義大夫，拜刑曹叅判。又



無同知春秋館義禁府事會首脩監視 山陵先  
生代署曹務微訟無滯新讞平允人多稱之壬子  
仲父棄養先生過毀善病仆應犀獄起囚人鄭浹  
誣引先生父子先生方困篤心中不甚了了倉卒  
被逮光海親加嚴問先生對簿語不能無少失次  
是日觀先生之事者皆知其疾病迷亂而誤聞者  
反摘訾先生以非情既得釋病益甚殆不起服闋  
杜門不與外事不與人往來人有問者亦不自雪  
墨墨如也唯作詩以見志戊午奸臣數罪 母后  
請廢之百脩怵迫奔走先生不詣列光海問金某



曷為不容奸黨有以同里故脩陳禍福強趣之先生不聽又庭議可廢不可廢病者令在家議之先生終不與議後詔使至銓曹以先生充迎慰使光海怒曰不庭造者可使償乎廢棄不錄者十有一年癸亥反正言者追咎已事坐謫吉州越五年丁卯量移牙山癸酉大赦許自便後三年乙亥蒙恩八都八月二十九日病卒于家春秋七十有五夫人李氏亦璿源貴族縣監天祐女年五十七先先生二十三年癸丑卒墓在舅判書兆後酉向之原至是年十一月二十日合葬于夫人墓中



先生內行修飭事親無違志以母夫人不逮養終身哀痛庶母難事曲意承奉終得其心居官斤斤故常不喜矜飾以賈過情譽而至論一切利害便否奮然自伸雖嚴上官不能棄其理自少儉約至顯無少易食無無味衣服車馬僅備性嗜書手不釋卷晚好通鑑綱目手抄二十卷目曰綱鑑要略見者歎其精要在吉州足不出門有問業者引以善誘戶屢怙滿州人子弟稍稍彬彬向學矣後聞先生喪皆致千里賻先生負用世之具思欲以所長自見既數經煩難人亦知其才且練事堪重寄而



先生素不依形勢之塗故身名在通塞間不幸遇  
灾跲而不振卒困謗議坎軻以歿豈非命也哉此  
自顯於事實非私親之言也夫人篤於孝順仁於  
宗族女工婦事不懈以敏使先生自安於貧約之  
時以遂其學者夫人助也凡育二男一女初無札  
瘥之閑終見顯榮蕃昌人以為福男長光煜戶曹  
叅議次光煒振威縣令女適京畿觀察使尹履之  
叅議一文適判官李穰縣令男四女三男長壽翼  
弘文館校理次壽奎女適宗室豐稷君濂餘幼觀  
察八男一女男坦郡守次某某官云云女適司憲



府掌令宋時吉內外曾玄孫七十二人側室有子  
三人光焜光煉一幼噫嘻癸丑之事先生遭齒舌  
太甚高明君子所必察敢以是請銘

伯氏右議政仙源先生行狀

始祖諱宣平佐麗祖有大功封為太師亞父功  
臣至今祭于社退溪李先生紀其事由太師  
以來七百餘年世襲冠冕

高祖諱永鉢司憲府掌令有虛白成公倪所撰  
墓碣銘

曾祖諱璠平壤府庶尹 贈吏曹判書兩館大



清陰先生集卷之三十  
提學有安分李公希輔所撰墓碣銘

祖諱生海信川郡守 贈議政府左贊成有林

塘鄭相國所撰墓碣銘

考諱克孝敦寧府都正 贈議政府領議政有

月沙李文忠公廷龜所撰墓碑銘

妣貞敬夫人東萊鄭氏左議政林塘公諱惟吉

之女江華府使諱福謙之孫領議政文翼公

諱光弼之曾孫有象村中文貞公欽所撰墓

誌銘

崇禎九年冬西虜傾國入寇不五日直至王京



當路守臣將臣效命者無一人我伯氏仙源先生  
肯殉義于江都從而死者八九人國雖不報其  
義氣烈烈昭揭為宇宙之棟幹可以有辭于天下  
後世者獨在是矣秉筆者固已書之國史而薦  
紳大夫以暨荒陬僻壤之人聞先生之事莫不咨  
嗟涕泣爭相傳以聳而間有一二渝生苟活之徒  
反訾議先生之死為過中噫此何足置喙也古者  
賢公卿殒列其行事薦之旂常勒之金石其功與  
德永垂不朽故曰雖有堯舜之盛必有典謨之篇  
然後揚名於後代者非虛言也況下聖人者烏可



己哉爲可己哉豐碑桓楹之辭或徵於一家昆弟  
之親而人乃謂之不問者近世金慕齋誌其弟思  
齋公尹文敬公狀其兄文靖公頗庶幾焉某不敢  
望於二先生然亦知其以親戚故而使獲過情譽  
非敬愛也謹撰次如左先生安東人姓金氏諱尚容  
字景擇自號仙源亦號楓溪又號溪翁我先君子委  
禽於林塘鄭相國之門生五丈夫子先生其長也  
生而端穎異凡兒稍長即不妄言笑在羣輩中動  
止自矧識者知其爲宰輔器十三從赴先君楊口  
縣邑居山水多童子觀遊之樂先生跡不出衙門



終日屈首佔畢居室之內寂若無人萬曆壬午中  
司馬第六名在類宮所與交皆名士而黃文敏慎  
李體素春英最相深契兩公才望傾一時至於劑  
量酸醎從容得中咸歸之先生己丑冬鄭汝立謀  
叛事發治獄蔓延適有求言之旨太學諸生上  
疏推先生冠首極陳明教化戒濫濫宣祖下教  
褒納明年秋除宣陵叅奉已擢文科乙科亡何  
與同年數人同薦史局方待補檢閱承文院又揀  
隸本院權知副正字故事未歷外館先領史薦新  
進極選人以為榮偕進者多沾沾自足喜臧否善



標榜以取名譽而先生深自謙遜若退避然是以  
得慶子稱及舅氏鄭左相再為知春秋於法當避  
先生久居散秩壬辰之亂寓江華故相鄭公澈為  
都體察使引為幕府從事隨往兩湖拜刑曹佐郎  
兼春秋館記事官亡何鄭公以謝恩使如京  
師先生急欲赴行在會金公瓚為湖南檢察使  
金公本鄭相貳价與先生同事幕府請于朝又  
以為從事先生留佐不果行亡何拜兵曹佐郎司  
諫院正言皆以在外見適移成均館典籍拜吏曹  
佐郎適金公有召儉之命先生亦還朝又帶



三字銜時 朝家多事格庶僚予告之例先生為  
長子迎相私出圻外坐罷亡何遇赦叙還吏曹遭  
婦喪病免又還吏曹兼世子侍講院司書陞本曹  
一卽無官如故亡何徵文坐罷未久遇赦叙拜弘  
文館修撰改成均館直講以接伴使金晬從事官  
隨日本冊使李宗城往嶺南明年春還 朝拜弘  
文館副應教又以都元帥權慄從事隨往湖南夏  
還 朝改成均館司藝明年夏又以接伴使張雲  
翼從事往候麻提督于義州提督至隨還 王京  
復拜副應教兼世子侍講院弼善初先生與申文



清江先生集卷之二十一

四十三

貞欽同在鄭相幕下俱以清裁鑑密著聲大小幕  
僭之辟皆願得二先生為重故道路戎馬之間勞  
勩最多亡何 皇帝遣監察御史陳效監東征諸  
軍以問禮官往義州明年正月還 朝擢拜承政  
院同副承旨先生資序尚淺於格不當注擬而出  
於 特命蓋異數也適左承旨李公鐵婚家當避  
上疏乞遯 許之又上疏請還加資 不許亡何  
李公去職先生復拜承旨序陞至左副夏如 京  
師賀 萬壽節先是使期有責限時 中國連歲  
出師東路郵傳已罷所至淹滯先生過期僅十許



日而言路糾罷亡何 上念勞特叙刑曹參議還  
承旨自是二年之間為承旨者八為參議刑曹兵  
曹者六辛丑春拜大司諫先生感不世之遇思有  
以一言報答會 召對策邊事公卿滿前先生進  
曰方今言路杜塞 宮禁不嚴此皆 聖德之大  
累治道之痼病臣請先務內修以立禦外之本可  
乎 上問爾謂不嚴何事毋敢有隱對曰臣聞某  
囚自負與力某弁陰圖節鉞人皆以為妄已而果  
驗民庶竊疑之然此豈 殿下所知者哉必有心  
人從吏為交通之階者乞 賜痛斷 上未荅



玉色甚厲左右縮頸莫有繼之者故相沈公喜壽  
啓曰此事民間謹言已久臣亦聞之諸臣無不聞  
之特畏懼不敢盡金某獨言之可謂鳳鳴朝陽於  
是上改容溫諭既退戚里禁鬻家相傳上震  
怒有所責問宮中惕息累日云因災異又上劄請  
勅宮奴釐貢案以抒民弊辭甚明剴上優答亡  
何移左承旨病免拜大司成改兵曹叅知又改叅  
議有失志醜正者伺上意使所等嶺南人投䟽  
故舉己丑治獄大臣以激上怒時事日變自以  
為得大柄又有素忤而其子姓尚翁主新得倖者



黃緣鑽入驥長銓衡遂肆意斥陟首逐先生為定  
州牧使長子死不葬不顧而行抵官十日詔使  
顧天峻崔廷健遽至使體與古學士大異有急難  
應副者陽怒它事甚生開端一州驚擾幾欲為竄  
先生能勿動追至嘉平卒成禮而去先生不以遷  
客自處精勤於職爬搔垢弊宿瘼為之一洗又以  
間飭學宮修舉文事肄諸生親加獎誨遂彬彬成  
就矣開廢渠灌田數千頃民大蒙利及它惠政在  
人口者甚多先生雖不好赫赫聲而報政為一道  
冠屢蒙褒賞秩滿還朝髭白擁車道為之枳



後追思碑之於是先生去國已三年二親老病不  
欲離傍側殊無仕宦意數月又除尚州牧使弔勉  
赴官官舍經亂盡燬先生次第繕治噲然改觀親  
問疾苦委曲拊循而其間里爭鬪細事一付之鄉  
三老郡中政簡民亦便之州居南方孔道冠蓋走  
集衿紳所聚齒舌挾翼以蜚前政鮮以完名去者  
至於先生無不服其寬恬雅整三年以鄉試官同  
考發解京使者稍近嫌舉子噪而出坐是罷歸亡  
何叙拜掌隸院判決事即日又除安邊府使人皆  
以為已甚時倖相尚在事其執益張而其為牧益



甚主銓者乃其客也不暇恤公論而達其指先生  
至官踰期其治如定州而益習吏事動如民情一  
境晏然 宣廟上昇以喪事 召還篆 大行銘  
旌授護軍已改僉知中樞府事又改刑曹叅議  
山陵畢陞嘉善大夫漢城府右尹改戶曹叅判無  
五衛都總府副總官亡何拜都承旨己酉 皇帝  
遣行人熊化 賜祭及謚太監劉用頒 冊命先  
生周旋左右無失儀特陞資憲大夫漢城府判尹  
兼都總官又兼知義禁府事已拜司憲府大司憲  
亡何病辭授同知中樞府事兼知春秋館事又拜



大司憲入對極論宮中巫覡祈禳之事請亟斥左  
道妖術以端出治之源亡何病辭授同樞又改知  
樞改封成陵以繕工提調視工役工訖陞正憲大  
夫拜刑曹判書病辭改知樞又改判尹癸丑四月  
朴應犀獄起先朝重臣名士少獲免者先生亦

被逮先海親問察其枉即日命釋奸黨深忌先生  
嗾囚誣引必欲得以甘心而先生平日行事雖善  
毀者無可指摘竟不能以有加也先生入獄置對  
自若出亦自若見者益驗其操守不惑已媵屬有  
考煞者株累坐罷先生杜門屏居日與諸弟娛侍



二親於世事朝政若不聞者明年叙授護軍丙辰  
陞崇政大夫先是追尊恭聖后廟主易故題用先  
生筆故也自癸丑以後奸臣謀行大事欲回以盡  
除異己者至明年丁巳遂劫大臣韓孝純等率百  
僚請廢大妃不與者並請竄殛先生不一造亦  
在遣中適改歲不報戊午先君棄諸孤大夫人就  
養子姓洪川縣舍先生不敢安京輦與諸弟奉几  
筵奔原州以近定省不毀之年備經危困率禮無  
愆人以為難庚申服闋天啓辛酉大夫人移往李  
子溫陽郡舍先生亦還京城之西江亡何溫陽罷



官大夫人又往子姓尼山縣舍是年冬丁憂奉檄  
歸祔先君墓甲子服闋拜判敦寧府事李适叛  
上出幸公州先生以檢察使先啟不乏供頓苟募  
遺丁義粟以佐調運會賊平扈 駕還都無帶同  
知成均館事已使鐵山毛帥營議處遼民事竣道  
拜兵曹判書先生負荷重寄益勤不懈曹事甚劇  
偶有未啓徑行者因是坐罷亡何別叙護軍已拜  
知敦寧 冊封詔使太監王敏政胡良輔等來以  
遠接使往迎鐵山中貴人素驕倨難得意事微細  
輒易怒善罵不復顧賓主禮儀其橐又無底無以



為飽先生念使事有體恐為其所傷為朝廷羞  
多方以解之終不失其好而外內主計者亦頗有  
以賴之已進崇祿大夫禮曹判書兼帶 經筵同  
知事 世子左副賓客都摠管明年春 上遭私  
感論禮互異 上不用大臣議急促禮官進喪服  
言路咎該曹先生辭適授副護軍兼官如故已改  
知樞又改議政府左叅贊夏葬毓慶園班 恩先  
生篆銘旋用進輔國崇祿大夫位極品尊與宰相  
侔矣先生上章力辭 不許於是兼帶 巡街去  
同官銜去副餘皆如故而於公府序坐不便辭改



本官授知敦寧已改判中樞亡何避大臣之西叙  
者改知樞兼禮曹判書丁卯二月西虜萬餘騎深  
入平山 上出幸江都先生受 命留寄嚴干採  
戢奸偷捕犯令者十餘人斬以徇衆城中肅然三  
月虜要盟而退 上還都親享 太廟先生充禮  
儀使資相以行已兼判義禁府事拜吏曹判書明  
年夏屢辭乞免輒予告 不許至秋懇辭不已方  
許適移拜禮曹判書冬病辭只遶金吾崇禎三年  
庚午入耆老社於是先生年七十上章請致仕  
上以時事艱虞 溫旨勉留再請又 不許亡何



譴罷時 章陵有可修可無修未及請 章陵者  
即上稱毓慶園與 上親考定遠大院君追尊為  
元宗大王合葬之陵也初議崇奉廷論久爭執既  
舉典禮 上猶內疑羣臣不盡心 特擢禮官之  
長以示警勸亡何別叙拜判敦寧復兼判義禁禮  
曹判書已病辭只適敦寧明年正月復請致仕  
不許先生以進退大閑為時勢所奪恒鬱鬱不自  
得四月以病屢辭只適金吾七月又病辭解春官  
已又為吏曹判書亡何譴罷先是李省身李景義  
等為臺諫論事觸忤久置散秩先生用兩人擬官



僚上並怒銓曹罷之明年正月別叙司直即拜  
右議政時右揆曠位已久羣謂上意有所待至  
是有是命同時覆名金甌者一家四人先生益  
恐懼逡巡欲辭避會有上急變者召命至門乃  
出已有士族女坐咀呪繫金吾者其事不明無可  
證衆口譁然稱寃而諸勲貴多有為一邊地上  
入前言命先生會三省雜治之先生以為疑獄  
不可徑蔽上章持已見固辭按獄之命上雖允  
其辭而內不悅頗示微旨先生不安居位遂請急  
斬釋端揆章七上上亟遣近臣慰諭不已不獲



已復出時設追崇都監都提調必用大臣監臨首  
相尹公病辭先生次當代泣龜勉承之始先生與  
大臣百僚共力持不可至是不強避蓋議禮行禮  
未定既定之異勢也先生雖不獲終守前見世皆  
信其為正也明年正月以病請急 不許遣近臣  
敦諭至四 上方不豫先生造庭起居至三月復  
請急久 不許暨問交道章二十九上乃一許蓋  
近世所罕也還判敦寧明年九月復入右揆三讓  
不許又明年六月復請急章七上得 允拜領敦  
寧府事先是叅議俞伯曾上疏力詆大臣其言絕



椎幾於罵羅萬甲亦極論時政闕失曰指斥掖庭  
上大怒並嚴譴先生陳劄狂戇之言宜加寬貸  
不納時言路久閉稍涉忌諱搖手相戒間有明白  
是非者輒疑護黨故無敢為上言之先生居常  
憂歎自以備列大臣不可循嘿以負國恩索言  
不避或諷其不知時變先生喟然不荅果以是去  
位明年丙子故相之位居右者還敦府當得領事  
先生改判府事司諫趙綱上疏論左相洪瑞鳳受  
人賂馬請逐之左相嘗公言綱小人後必為厲階  
綱聞而銜之至是乃發然實不如其所言上亦



疑之召綱問誰受綱不首贅舉左相它污狀欲甚其罪上益疑之欲廷尉問問諸大臣先生以為朝廷固重臺諫顧未愈於重大臣綱所言非細事不可不核適首相昇平公議亦如之於是下綱理外議譁然非之臺諫又爭執上反咎前議是非無主右綱者至謂大臣專主護黨焚亂已甚先生愈不樂在朝復請致仕章三上不許溫諭特示悔意亡何先生素患眩旋暴作上遣醫診視續賜內劑至十二月十二日義州告急書至倉猝下教老病宰臣先出十四日命尹相昉奉



廟社先詣江都先生從後行道頓撼疾欲幾不得  
遂是日賊兵過松京撥軍盡走羽書不時至上  
將出戒有司城中擾亂號令不得行百官失氣多  
有徒步奔走者士女填道哭聲沸天至晚車駕  
始發侍衛草草不成列未及城門報賊哨馬已至  
西郊上下錯愕計不知所出羣臣或勸上姑  
幸山城遂回駕由水口門入南漢而江都路隔  
斷矣賊圍山城半月諸道勤王師無至者至徙  
月為明年丁丑正月也忠清監司鄭世規引兵先  
至遇賊軍潰後來諸軍觀望不進城中日益危急



江都檢察使金慶徵副使李敏求留守張紳皆擁  
妻孥挾私重不思守戰備惟日事宴安人有規警  
必盛氣逆折旁觀者無不寒心先生憂恚特甚奮  
曰行在受圍日久危在朝夕今鄭世規敗道路  
傳言已死湖西無主事者江都檢察一人足了副  
使宜急往湖西收散卒糾義旅督湖南兵在後者  
以鎮軍民之情赴君父之急機不可緩敏求殊  
無意行至涕泣危懼座中皆憚慶徵敏求無復明  
言但視其意所在為遷就之說而已先生又言山  
城消息不通急募死士問上起居探賊形勢十



往必有一達臣子之義豈可束手坐觀乎慶徵等  
益惡聞相與詆之曰自有權此者非避亂大臣所  
預先生遂不復言亡何通津假守金迪報賊大至  
張紳慶徵皆不信曰唉怯夫江水流漸賊安能飛  
渡軍事視如它日至二十一日賊到津口用平底  
二小舸載數十降人嘗試我忠津水使姜晉旼先  
走檢察留守諸官一時奪舸遁去賊遂進兵圍城  
先生知事不濟與家人訣上南城譙門中解所服  
戎衣授僮人放火自燒意留以為復也先生孫壽  
全年十三時在側命僕掖歸挽衣泣不去曰當從



翁逝尚何歸僕亦不去遂同死實二十二日壬戌也賊退諸孤覓屍終不得乃以是年四月十六日葬衣冠于楊州陶穴里先塋側異向之原嗚呼痛哉嗚呼痛哉先生生于嘉靖辛酉五月至是得壽七十有七嘗自為生誌及葬如遺命焉先生為人愷悌誠實容貌粹夷其內如外事父母婉曲承意自少至老未嘗有忤待諸弟如已視其子如已子御家衆有恩而威亦不廢門庭之內穆如也與人處和易絕無畦畛而中實毅然有不可奪之志辭受之際稱心以行不為矯飾少時侍王母疾不解



衣者三月以身代親忘其勞晚築楓溪水石先君子悅其勝肩輿日往來而性喜客所至無虛席先生輒營具擇味以進及佳辰壽節座客無間貴賤下至伶工伎樂必致親意所嚮者靡不曲盡先君子善於德大夫人善於惠家婦善於養子弟善於馴又皆科第簪纓以資歡悅啓齒以為人豔世皆歸福於先生仲氏長湍君溫病死親自棺斂不避叔氏叅奉君歿大夫人痛不欲生先生恐重傷其意自外歸和色而後見慰諭百方而其自與諸弟私痛若喪手足不令二親知也俸祿半入孤寡貧



窮之家家無餘蓄嘗召匠修屋既周視私語人曰  
所出八多未見貴家空空若此雖習於先生者外  
覩池臺花竹之美意先生非寒儉而實不知家人  
內困也患世俗侈靡無度至於享先以表沒禮貧  
者多由廢祭非先王制禮之意著祭式以訓子孫  
燕居不御采服常食不設盛饌取古人勢不可倚  
盡福不可享盡等語書諸座隅以寓戒性嗜書無  
一日不開卷多蓄古今法書名畫環列左右聲伎  
駉雜之戲無所好為文辭達而理勝詩亦清腴合  
度不以此自名筆法端麗小楷深得二王遺模



國家廟主多先生筆最精於鳥跡史籀之體獨擅一代薦紳間求篆墓石者無兩適至有刻碑而更磨之必得先生篆以為重也三八銓曹不濡滯或坐事徑去而乃先生蚤自思退初無戀位意忤倖相七年三黜皆關塞嶺海之遠人所厭苦而夷然處之其為宗伯賢相大禮進止雍容不爽尺寸庭中咸目屬之視作穆陵領其事者好矜氣數以小苛禮相侵先生受而不較終乃媿解屢長部臺金吾凡所斷讞以情輔法不輕為操切一歸於公直忠厚其恬於勢利當於喜愠習於威儀寬於



用法又如此自侍從卿月以至三事八以告旃厦  
坐與諸公講畫其陰德於小民而可著為挈令者  
不易數獨先生素謹於溫室當世外乘又甚鹵莽  
以是人鮮知者在江都日智者已憂其敗或勸先  
生盍具舟脩緩急先生歎曰主上在園中安危  
不可知宗社元孫皆在此萬一不幸有死而已  
安所偷生蓋先生之心已素定矣嗚呼痛哉嗚呼  
痛哉始先生凶問至士大夫皆慟曰先生豈真死  
耶善人奚及此已而復慟曰先生真不死也或言  
死不酷無以表忠烈奈何不幸而不以天年含祿



顧以身為 國家光而以哀貽無涯之私憾耶某  
少先生十年而素孱弱先生氣王健七箸且以為  
百歲矣尚憲既已畸於世幸長有林泉而先生終遂  
乞骸之請庶幾共享期頤之樂而事乃反覆不得  
以餘年奉先生疾病顛仆又不得求之於原隰之  
哀生為兄弟死同路人天乎寧有是耶嗚呼痛哉  
嗚呼痛哉夫士平居讀古人書鼓頰抵掌而談節  
義一朝變故有大不然若壽全與僕人不過一童  
子廝役非有稽古之力講論之素而乃能臨難不  
貳視死如歸豈不於天性彝倫無憾而亦有得於



常所染濡也歟其視背君命棄老母抱首鼠竄者  
何如也先生娶永嘉權氏戶曹佐郎愷之女領議  
政轍之孫純德淑行協于上下內外親皆悅而歸  
之年三十三病卒追封貞敬夫人葬在江都鎮江  
里其父母兆次先生有治命將待歲移祔焉舉四  
男三女一男次先生平生言行可書者多老病昏  
忘不能脩記猶記其大者昔司馬氏以滅世家賢  
大夫之業不述為罪立言之士宜有以思其責乎  
哉如蒙哀死者愍生者畀以一言之惠籍手以永  
不朽則奚止一家幽明之感亦將于 國有光也



男長光炯有文行蚤世 贈左承旨娶縣令李

獻謨女生一男壽昌司僕寺主簿壽昌娶縣  
監柳焯女生一男一女皆幼

次光煥春川府使娶承旨李鐵女生一男壽弘  
進士壽弘娶掌令蘓光震女生一女幼

次光炫戶曹參判娶進士沈慄女生三男五女  
男壽仁縣監其二幼女適侍直趙錫馨次監  
役尹雲舉次士人李延夔次洗馬姜文明次  
士人李恢壽仁娶縣監成弘憲女生二男三  
女皆幼



長女壻翊衛司司禦南好學生一男三女男老  
星京圻都事女適叅奉朴承健次士人申命  
圭季未行

次吏曹判書張維生一男一女男善澂女為  
鳳林大君夫人

次楊根郡守李以省生四女長適士人尹弼殷  
次士人金鉞餘幼

側室一男四女男光燭錄振武功為抱川縣監  
生二男四女壽全即其長子女適宗室彥興  
令純善餘皆幼




女為判書韓仁及妾次適縣監李應寅次為郡  
守李碩望妾李為成後寵妻


內外曾孫男女摠二十九人

清陰先生集卷之三十七











卷一

目錄

一

冊



Asami 39.66

v. 13 of 14

清陰先生集

十三

front

spine to right

OCLC

701724705



z0058



chongumsonsaengc138800

z0058

Ch'ongum Sonaeng chip

13

C. V. Starr East Asian Library, Univers  
California, Berkeley

C. V. Starr East Asian Library, Univers  
California, Berkeley



chongumsonsaengc138800

Tuesday, April 19, 2011 11:58:41